

MESYUARAT KETIGA, PENGGAL KEDUA  
PARLIMEN KEEMPAT BELAS  
2019

**HARI ISNIN : 11 NOVEMBER 2019**

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**  
**DARIPADA : YB TUAN TEH KOK LIM**  
**KAWASAN : TAIPING**  
**TARIKH : 11 NOVEMBER 2019 (ISNIN)**

**SOALAN :**

**YB TUAN TEH KOK LIM** minta **MENTERI KERJA RAYA** menyatakan apakah tindakan yang akan diambil dalam usaha memastikan kerja-kerja projek Kerajaan baru dilaksanakan dengan kos yang lebih berpatutan demi kepentingan semua rakyat.

**JAWAPAN :**

Tuan Yang Di-Pertua,

Untuk makluman Ahli Yang Berhormat, dalam usaha memastikan projek Kerajaan baru dilaksanakan dengan kos yang lebih berpatutan demi kepentingan semua rakyat maka semua perolehan bagi projek kerajaan akan ditawarkan secara tender terbuka seperti mana yang telah ditetapkan oleh Kementerian Kewangan.

Di samping itu pula, pihak Kementerian akan melaksanakan Makmal Pengurusan Nilai (Value Management Workshop) bagi setiap projek dengan kos yang melebihi RM50 juta, sebagaimana yang telah diwajibkan oleh pihak Kementerian Hal Ehwal Ekonomi. Makmal Pengurusan Nilai merupakan satu *management tool* di dalam pelaksanaan projek untuk mencapai nilai untuk wang (value for money) bagi setiap projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATUK SERI HAJI AHMAD BIN**  
**HAMZAH**  
**[SETIAWANGSA]**  
**TARIKH : 11 NOVEMBER 2019 (ISNIN)**

**SOALAN NO. 2**

Minta **MENTERI KEWANGAN** menyatakan apakah langkah dan usaha Kerajaan untuk menentukan hala tuju kewangan Islam mampu memberi impak yang lebih besar kepada pembangunan ekosistem ekonomi negara sekali gus berupaya untuk memperkasakan sistem ekonomi kewangan Islam.

**JAWAPAN**

Yang di-Pertua,

Saya ingin menjawab soalan ini bersekali dengan soalan Yang Berhormat Nibong Tebal yang dijadualkan pada 14 November 2019 memandangkan ia melibatkan isu yang sama.

Untuk makluman Ahli Yang Berhormat, Kewangan Islam merupakan komponen penting yang sentiasa menjadi salah satu fokus utama dalam agenda pembangunan sistem kewangan di Malaysia. Kerajaan dan agensi-agensi berkaitan seperti Bank Negara Malaysia (BNM), Suruhanjaya Sekuriti Malaysia serta semua institusi kewangan Islam di Malaysia telah bersama-sama berusaha membina sebuah ekosistem yang kukuh dan berdaya saing dalam memacu kemajuan sektor kewangan Islam di negara ini. Hasil usaha yang berterusan dan tersusun ini telah berjaya mengekalkan kedudukan Malaysia di tempat teratas daripada 56 buah negara dalam pelbagai dimensi indikator kemajuan kewangan Islam pada peringkat global, sebagaimana yang dilaporkan pada setiap tahun oleh Laporan Pembangunan Kewangan Islam yang diterbitkan oleh Thomson Reuters sejak tahun 2013.

Yang di-Pertua,

Di samping itu, Malaysia International Islamic Financial Centre (MIFC) telah memainkan peranan yang penting pada peringkat awal pengantarabangsaan kewangan Islam melalui pelaksanaan pelbagai inisiatif terutamanya dengan sokongan DYMM Paduka Sultan Nazrin Muizzuddin Shah sebagai penaung diraja untuk mempromosikan Malaysia sebagai pusat kewangan Islam antarabangsa. MIFC juga menganjurkan Majlis Anugerah Diraja Kewangan Islam setiap dua tahun bagi memberikan

pengiktirafan kepada individu yang telah memberikan sumbangan yang besar dalam bidang kewangan Islam.

Meskipun sistem kewangan Islam telah mencatat pertumbuhan yang memberangsangkan, Kerajaan sentiasa menambah baik sistem penyampaian kewangan Islam agar ia dapat menjana impak yang positif kepada rakyat. Antara langkah yang telah dan sedang diambil adalah:-

### **Objektif 1: Menentukan hala tuju kewangan Islam**

- i. **Pengukuhan rangka kerja perundangan, pengawalseliaan dan pematuhan Syariah.** Antaranya melalui Penggubalan Akta Perkhidmatan Kewangan Islam 2013 bagi memastikan kestabilan sistem kewangan Islam dan memastikan aspek Syariah dipatuhi sepenuhnya oleh intitusi kewangan Islam serta menerbitkan 14 piawaian Syariah untuk memberikan garis panduan yang jelas dan komprehensif mengenai kontrak-kontrak Syariah dan aplikasi operasinya. Piawaian Syariah ini turut dijadikan rujukan bagi pembangunan Piawaian Syariah di negara-negara lain seperti di Qatar dan Afghanistan.
- ii. **Penubuhan Jawatankuasa Khas Kewangan Islam (JKKI)** oleh Kementerian Kewangan (MOF) pada Ogos 2019 untuk mempromosikan dan menggalakkan pembangunan kewangan Islam serta bertanggungjawab menyelaraskan peranan dan tanggungjawab pihak berkepentingan untuk meningkatkan industri kewangan Islam di Malaysia.
- iii. **Pengenalan konsep pengantaraan berasaskan nilai** (value-based intermediation, VBI) sejak tahun 2017 bagi menyokong pencapaian Matlamat Pembangunan Mampan (Sustainable Development Goals, SDG) oleh Pertubuhan Bangsa-Bangsa Bersatu (PBB).

## **Objektif 2: Usaha-usaha untuk memperkasakan sektor Kewangan Islam**

- iv. **Penerokaan instrumen kewangan sosial** bagi mengurangkan jurang pembiayaan dan perlindungan takaful bagi rakyat, terutamanya golongan berpendapatan rendah atau B40.
- v. **Mempelbagaikan peluang pelaburan menerusi pengenalan Akaun Pelaburan (*Investment Account, IA*) dan Platform Akaun Pelaburan (*Investment Account Platform, IAP*).**
- vi. **Memperhebat sokongan kewangan Islam ke arah pertumbuhan perniagaan halal** melalui Skim Pembiayaan Patuh Syariah Perusahaan Kecil dan Sederhana (PKS).
- vii. **Memudah cara dan menyebarkan luas urusan kewangan rentas sempadan melalui perkongsian kepakaran dan perkongsian prasarana kewangan Islam** dengan pelbagai negara, termasuk The United Kingdom, Hong Kong, Turki, Indonesia dan Jepun, menerusi hubungan dua hala yang lebih erat.
- viii. **Membangunkan kapasiti modal insan untuk menyokong ekonomi negara dan kewangan Islam** melalui institusi-institusi pendidikan kewangan Islam seperti *International Centre for Education in Islamic Finance (INCEIF)* dan *International Shari'ah Research Academy for Islamic Finance (ISRA)*.

Pada tahun 2018, INCEIF telah menerima penganugerahan akreditasi berprestij oleh Association to Advance Collegiate School of Business (AACSB). Akreditasi ini telah menempatkan INCEIF dalam kalangan 5% program perniagaan terpilih dunia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WONG HON WAI  
[ BUKIT BENDERA ]**

**TARIKH : 11 NOVEMBER 2019  
[ ISNIN ]**

**SOALAN NO. 3**

Minta **MENTERI PERUMAHAN DAN KERAJAAN TEMPATAN** menyatakan menyatakan senarai insiden kebakaran terbuka yang berlaku di ladang serta hutan di Malaysia pada Ogos dan September 2019 yang direkodkan oleh Jabatan Bomba dan Penyelamat dan apakah tindakan ke atas tuan punya tanah tersebut dan langkah-langkah pencegahan yang boleh dilaksanakan.



**JAWAPAN**

Tuan Yang di-Pertua,

1. Untuk makluman Yang Berhormat, berdasarkan rekod Jabatan Bomba dan Penyelamat Malaysia (JBPM), sebanyak **1,433 kes** kebakaran terbuka telah berlaku di seluruh negara melibatkan **ladang (763 kes)** dan **hutan (670 kes)** sepanjang bulan **Ogos** hingga **September** 2019 di mana negeri **Johor** mencatatkan kes tertinggi iaitu **580 kes** kebakaran terbuka. Senarai insiden mengikut pecahan kebakaran ladang dan hutan mengikut negeri adalah seperti berikut:

Bil.	Negeri	Bil. Kes Kebakaran Ladang (Ogos-Sept. 2019)	Bil. Kes Kebakaran Hutan (Ogos-Sept. 2019)	Jumlah Kes (Ogos- Sept. 2019)
1.	Johor	428	152	580
2.	Selangor	131	95	226
3.	Sarawak	68	125	193
4.	Sabah	67	112	179
5.	Perak	32	53	85
6.	Negeri Sembilan	10	54	64
7.	Pahang	14	43	57
8.	Terengganu	2	18	20
9.	Kelantan	3	9	12
10.	Pulau Pinang	2	6	8
11.	Melaka	6	2	8
12.	Kuala Lumpur	0	1	1
13.	Putrajaya	0	0	0
14.	Kedah	0	0	0
15.	Perlis	0	0	0
16.	Labuan	0	0	0
<b>Jumlah</b>		<b>763</b>	<b>670</b>	<b>1,433</b>

2. Antara langkah-langkah pencegahan yang telah diambil oleh Kementerian Perumahan dan Kerajaan Tempatan (KPKT) bagi mengelakkan kebakaran terbuka adalah dengan mengaktifkan **Pelan Tindakan Pembakaran Terbuka Kebangsaan** dan **Pelan Tindakan Jerebu Kebangsaan** bagi menghadapi situasi jerebu negara.

3. JBPM sebagaimana yang dinyatakan dalam pelan tindakan tersebut, bertanggungjawab melaksanakan kerja-kerja pemadaman dan pemantauan menggunakan aset-aset kebombaian seperti helikopter, jentera bomba, peralatan dan kelengkapan kebombaian dengan kekuatan 14,600 pegawai bomba di seluruh negara.

4. Selain itu, JBPM juga mengambil inisiatif melaksanakan program kempen penyebaran maklumat pencegahan melalui aktiviti pembelajaran dan kesedaran awam termasuk seminar keselamatan kebakaran merangkumi larangan pembakaran terbuka kawasan ladang dan hutan.

5. Mengenai tindakan ke atas tuan punya tanah yang terlibat dengan kebakaran terbuka, perkara ini adalah di luar bidang kuasa KPKT. Perkara tersebut perlu dirujuk kepada Jabatan Alam Sekitar kerana siasatan perlu dibuat bagi mengenal pasti sama ada kebakaran tersebut dicetuskan oleh pemilik tanah, orang persendirian atau secara semula jadi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN ANYI NGAU**  
**[BARAM]**  
**TARIKH : 11 NOVEMBER 2019 (ISNIN)**

**SOALAN NO. 4**

**Y.B. TUAN ANYI NGAU [ BARAM ]** minta **MENTERI KEWANGAN** menyatakan peruntukan tahunan untuk tujuan MARRIS di Sarawak dan jarak jalan yang diselenggarakan. Nyatakan SOP untuk melayakkan sesebuah jalan agar diselenggarakan di bawah peruntukan MARRIS.

**JAWAPAN**

Untuk makluman Yang Berhormat, Pemberian Penyelenggaraan Jalan Negeri (MARRIS) disediakan berdasarkan peruntukan Perkara 109(1)(b) Perlembagaan Persekutuan dan dikira mengikut Peruntukan Bahagian II Jadual Kesepuluh Perlembagaan Persekutuan. Ia bertujuan untuk membantu Kerajaan Negeri menyelenggara jalan raya negeri, jalan raya bandaran, jalan kawasan perumahan kos rendah, lorong belakang, jalan kampung, jalan pertanian dan jalan pulau pelancongan. Bagi melayakkan negeri-negeri menerima peruntukan MARRIS, jalan-jalan di negeri masing-masing perlu didaftarkan di dalam Sistem MARRIS Online.

Peruntukan MARRIS yang telah disalurkan oleh Kerajaan Persekutuan kepada Negeri Sarawak pada tahun 2018 adalah berjumlah RM872.5 juta. Pemberian MARRIS disalurkan terus kepada Akaun Amanah Penyelenggaraan Jalan Negeri Sarawak. Pengagihan peruntukan MARRIS kepada agensi pelaksana penyelenggaraan dan jarak jalan yang diselenggara adalah di bawah bidang kuasa Kerajaan Negeri.

**PEMBERITAHUAN PERTANYAAN BAGI JAWAB LISAN**  
**DEWAN RAKYAT MALAYSIA**

**PERTANYAAN : JAWAB LISAN**

**DARIPADA : DATUK SERI DR. RONALD KIANDEE**  
**[ BELURAN ]**

**TARIKH : 11 NOVEMBER 2019**

**SOALAN**

**DATUK SERI DR. RONALD KIANDEE [ BELURAN ]** minta **MENTERI LUAR NEGERI** menyatakan sejauh manakah Kerangka Dasar Luar Malaysia Baharu akan dapat menangani isu di seluruh dunia kini yang mana negara-negara kuat mengenakan tindakan secara *unilateral* terhadap negara-negara lain sehingga mencabuli perjanjian antarabangsa dan resolusi-resolusi PBB.

**JAWAPAN**

Tuan Yang di-Pertua,

Saya mengucapkan terima kasih kepada Yang Berhormat Beluran atas pertanyaan yang dikemukakan.

Tuan Yang di-Pertua,

2. Sebagaimana Dewan yang mulia ini sedia maklum, Kerangka Dasar Luar Malaysia Baharu telah pun dilancarkan oleh YAB Perdana Menteri pada 18 September 2019. Saya amat berbesar hati di atas keprihatinan yang diberikan terhadap kandungan Kerangka tersebut.

3. Kelantangan pendirian Malaysia terhadap ketidakadilan, penindasan dan jenayah-jenayah terhadap kemanusiaan adalah nyata dan tidak perlu diragui. Malaysia turut menentang sekeras-kerasnya tindakan yang bersifat unilateralis di mana terdapat trend negara berkuasa memaksa negara lain mengikut telunjuk mereka dengan mengenakan pelbagai bentuk tekanan sama ada politik atau ekonomi ke atas negara yang lebih lemah dan kecil. Terdapat juga sesetengah negara yang melanggar perjanjian antarabangsa dan resolusi Pertubuhan Bangsa-Bangsa Bersatu (PBB) secara terang-terangan.

Tuan Yang di-Pertua,

4. Menyentuh perkara dasar yang dikemukakan di dalam soalan Yang Berhormat Beluran, saya ingin menyatakan bahawa Kerangka ini bukan satu formulasi dasar luar yang baru. Kerangka ini merupakan satu garis panduan dan pedoman yang jelas dan sistematik untuk rujukan para pengamal diplomasi di Malaysia mahupun antarabangsa dalam pengendalian hubungan luar negeri terutamanya sewaktu berdepan dengan persekitaran dunia yang serba mencabar ini. Malaysia beriltizam untuk memperjuangkan suatu dasar luar yang progresif, bertunjangkan demokrasi yang matang, dan dilihat dari sudut pandang sebuah negara yang maju.

## **NO. SOALAN : 5**

5. Kerangka ini menyediakan pendekatan yang lebih holistik di dalam memacu dasar luar negeri Malaysia yang lebih progresif. Ini bagi membuktikan pendekatan dasar luar negeri Malaysia berupaya untuk menangkis sebarang sekatan atau tindakan unilateral yang dikenakan oleh negara-negara lain.

6. Malaysia tidak teragak-agak untuk terus bertindak secara proaktif dan berkesan dalam organisasi-organisasi antarabangsa termasuk PBB supaya peranan Malaysia menjadi lebih bermakna dan berimpak tinggi. Malaysia akan menentukan hala tuju wacana antarabangsa dengan mengambil bahagian secara aktif dalam perbincangan di pelbagai forum antarabangsa yang Malaysia adalah ahli, selain mempengaruhi proses membuat keputusan di forum antarabangsa yang Malaysia bukan ahli.

Tuan Yang di-Pertua,

7. Kita juga tidak akan mengabaikan kepentingan hubungan akrab dengan negara-negara lain yang diamalkan selama ini. Hubungan yang erat ini akan terus menjadi keutamaan Malaysia dan bersendikan kepada prinsip-prinsip dan norma-norma undang-undang antarabangsa. Melalui cara ini, dapatlah kita menangani sebarang isu yang timbul melalui mekanisme penyelesaian secara aman mengikut hala tuju dan acuan Malaysia sendiri.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SRI HAJAH NANCY SHUKRI  
[ BATANG SADONG ]**

**TARIKH : 11 NOVEMBER 2019 (ISNIN)**

**SOALAN**

**DATO' SRI HAJAH NANCY SHUKRI [ BATANG SADONG ]** minta **MENTERI KOMUNIKASI DAN MULTIMEDIA** menyatakan langkah yang diambil untuk memastikan pengguna internet tidak menyalahgunakan isu-isu perkauman dan keagamaan untuk kepentingan politik hingga menjejaskan keharmonian negara.



**JAWAPAN**

Tuan Yang Dipertua,

1. Izinkan saya menjawab pertanyaan ini bersekali dengan pertanyaan daripada Ahli yang Berhormat **Puan June Leow Hsiad Hui [Hulu Selangor]**, 20 November 2019, soalan 27 kerana ianya menyentuh isu yang sama dan berkaitan.

2. Untuk makluman Ahli Yang Berhormat, satu jawatankuasa khas yang dinamakan Jawatankuasa Jenayah Siber PDRM-MCMC telah ditubuhkan bertujuan untuk memerangi ancaman jenayah siber secara lebih strategik dan tersusun. Jawatankuasa yang dianggotai oleh Jabatan Siasatan Jenayah Komersial PDRM dan SKMM ini berperanan untuk menyelaraskan tindakan penguatkuasaan yang lebih pantas dan bersepadu ke atas sebarang perlakuan jenayah siber di negara ini, terutamanya apabila ianya melibatkan isu-isu sensitif seperti 3R (*race, religion, royalty* dengan izin). Jenayah Siber di negara ini juga termasuk macau scam, perjudian atas talian, pencurian maklumat, pengubahsuaian program atau data komputer dan pengodaman.

3. Selain itu, SKMM juga giat dalam mendidik rakyat Malaysia supaya menjadi pengguna media sosial yang berhemah. Melalui program Klik Dengan Bijak (KDB) yang diperkenalkan pada 2012, SKMM berusaha membudayakan penggunaan Internet secara berhemah menerusi tiga (3) teras utama iaitu Keselamatan, Kewaspadaan dan Tanggungjawab yang menitikberatkan kawal selia sendiri. Kini, program tersebut telah menjangkau hampir lima (5) juta rakyat Malaysia. Tambahannya pula, portal sebenarnya.my membolehkan rakyat Malaysia menyemak kesahihan maklumat yang diterima sebelum berkongsi dengan orang lain.

4. Berkenaan laporan yang diterima oleh SKMM melibatkan isu 3R, pihak SKMM telah menerima sejumlah **21,296** maklumat daripada orang awam di media sosial dalam tempoh enam minggu pertama sejak platform khas penyaluran maklumat bagi kandungan 3R itu diwujudkan pada 17 Ogos yang lalu. Platform 3R membolehkan rakyat Malaysia

## SOALAN NO : 6

untuk memberi maklumat mengenai penyebar kandungan berunsur perkauman, keagamaan dan menghina institusi Diraja demi kepentingan bersama.

5. Daripada jumlah keseluruhan maklumat yang diterima oleh SKMM, **19,968** masih dalam proses pengesahan manakala **259** maklumat yang diterima telahpun diambil tindakan. Tindakan yang diambil termasuk memulakan siasatan terhadap penyebar maklumat berkenaan, laporan penyalahgunaan dan penurunan kandungan dengan kerjasama pihak penyedia platform media sosial, serta merujuk kepada pihak berkuasa lain untuk tindakan susulan. Tempoh tindakan susulan yang diambil berbeza mengikut setiap kes.

6. Penelitian SKMM mendapati **80%** daripada maklumat yang diterima mempunyai kandungan berbaur perkauman manakala **20%** menjurus kepada isu agama.

7. Pihak Kerajaan juga mahu mengingatkan rakyat Malaysia supaya bertindak matang dengan tidak memuat naik sebarang mesej berbaur 3R yang boleh mengganggu gugat ketenteraman dan keharmonian awam.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN KHOO POAY TIONG [ KOTA MELAKA ]**

**TARIKH : 11 NOVEMBER 2019 (ISNIN)**

**SOALAN NO. 7**

**TUAN KHOO POAY TIONG [ KOTA MELAKA ]** minta **MENTERI KESIHATAN** menyatakan apakah inisiatif-inisiatif kesihatan (sedia ada dan yang bakal diperkenalkan) untuk golongan berpendapatan M40.

**JAWAPAN**

**Tuan Yang di-Pertua,**

Kementerian Kesihatan Malaysia (KKM) sentiasa memastikan kebajikan rakyat terus terbela tanpa mengira kelas pendapatan rakyat, namun begitu terdapat juga program-program kesihatan yang menjurus kepada kelas pendapatan seperti Program Skim Peduli Kesihatan B40 (PeKa B40) bagi membantu mereka yang sangat memerlukan. Namun begitu, golongan berpendapatan M40 masih menikmati pelbagai bantuan Kerajaan melalui KKM.

Perkhidmatan kesihatan bagi seluruh rakyat Malaysia termasuk golongan M40 di fasiliti KKM adalah bersubsidi dengan kadar bayaran minima atau percuma. Caj yang dikenakan adalah RM1 bagi pesakit luar dan RM5 bagi klinik pakar.

- Caj RM1 adalah merangkumi pendaftaran, perundingan, siasatan (seperti X-ray, Ujian Air Kencing) dan Ubat-ubatan.

## SOALAN NO : 7

- Caj RM5 bagi klinik pakar juga adalah merangkumi pendaftaran, perundingan, siasatan (seperti X-ray, Ujian Air Kencing) dan Ubat-ubatan bagi kes yang dirujuk oleh doktor perubatan Kerajaan dan bagi kes yang dirujuk oleh pihak swasta, pesakit perlu membayar kos bagi siasatan (seperti X-ray, Ujian Air Kencing) berdasarkan kepada kos seperti yang dinyatakan di dalam Perintah Fi (Perubatan) 1982.

Caj maksimum bagi pesakit kelas tiga pula adalah tidak melebihi RM500 bagi setiap kemasukan hospital. Untuk warga emas, diskaun 50% diberikan ke atas caj yang dikenakan dengan maksimum caj sebanyak RM250. Pemegang kad OKU diberi pengecualian di wad Kelas 3.

KKM juga mempunyai mekanisme dalam membantu pesakit-pesakit yang tidak mampu dan kurang berkemampuan melalui Tabung Bantuan Perubatan (TBP). Tabung ini ditubuhkan sejak 2005 untuk membiayai sebahagian atau sepenuhnya kos rawatan dan perubatan penyakit kronik yang boleh dirangkumkan dalam pelbagai disiplin seperti kardiologi, ortopedik, otorinolaringologi (ENT), paediatric dan sebagainya. Bantuan ini juga adalah termasuk kos ubat-ubatan yang tidak disediakan oleh pihak Hospital Kerajaan.

KKM juga telah menyediakan subsidi bagi pesakit kurang berkemampuan untuk mendapat rawatan di Institut Jantung Negara (IJN) dengan menanggung sepenuhnya atau sebahagian dari kos perubatan dan rawatan, tertakluk pesakit memenuhi syarat-syarat yang telah ditetapkan di dalam peraturan yang berkuatkuasa. Secara puratanya, setiap tahun KKM membelanjakan sebanyak RM450 juta bagi pesakit kurang berkemampuan mendapat rawatan di IJN.

Selain itu, sejak tahun 2001 Kerajaan telah menyediakan subsidi kepada pesakit buah pinggang yang kurang berkemampuan menjalani rawatan hemodialisis di pusat-pusat hemodialisis Badan Bukan Kerajaan (NGO) yang berdaftar dengan KKM. Mulai tahun 2018, bantuan subsidi rawatan hemodialisis telah dinaikkan ke kadar RM100 dari RM50 bagi setiap rawatan dan pesakit hanya perlu membayar RM10 sahaja bagi setiap sesi rawatan daripada keseluruhan kos RM110 termasuklah kos suntikan erythropoietin (EPO) sebanyak RM18.50 ketika membuat rawatan di pusat hemodialisis NGO yang berdaftar dengan KKM.

## SOALAN NO : 7

Kerajaan telah memperuntukkan sebanyak RM50 juta setahun bagi tujuan ini.

KKM komited untuk memastikan rakyat dapat menikmati akses kepada perkhidmatan kesihatan berkualiti berasaskan keperluan, tanpa terdedah kepada kesulitan kewangan sejajar dengan prinsip '*Universal Health Coverage*' (dengan izin). Ini bagi memastikan jaringan keselamatan yang kukuh untuk semua tanpa mengambil kira paras pendapatan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS (2019)**

**PERTANYAAN : LISAN**

**DARIPADA : YB DATUK DR. JEFFREY GAPARI  
KITINGAN [ KENINGAU ]**

**SOALAN**

Minta **MENTERI PELANCONGAN, SENI DAN BUDAYA** menyatakan adakah Kerajaan bercadang untuk menyalurkan peruntukan kepada Kementerian Pembangunan Luar Bandar, Kementerian Kerja Raya dan Kementerian Pelancongan, Kesenian dan Kebudayaan dalam Bajet 2020 untuk membangun dan memajukan Gunung Trusmadi (gunung ke-2 tertinggi di Sabah dan Malaysia) dan kawasan-kawasan peranginan dan pertanian berhampiran sebab kawasan tersebut berpotensi besar untuk pelancongan dan pertanian tanah tinggi.

**JAWAPAN**

Tuan Yang di-Pertua,

Untuk makluman Yang Berhormat, penyaluran peruntukan kepada Kementerian-kementerian lain adalah di luar bidang kuasa Kementerian Pelancongan, Seni dan Budaya. Berhubung peruntukan pembangunan dalam bajet 2020, kementerian tidak mendapat sebarang permohonan daripada kerajaan negeri bagi membangun dan memajukan gunung Trusmadi. Walau bagaimanapun, di bawah Rancangan Malaysia KeSepuluh (RMKe-10), Kementerian ini telah memperuntukan sebanyak RM4 juta bagi Peningkatan Kemudahan Pelancongan Di Hutan Simpan Trus Madi.

Komponen yang terlibat bagi projek ini ialah menaiktaraf denai pendakian ke puncak gunung Trus Madi, membina rumah rehat serta pondok rehat di sepanjang denai pendakian ke puncak gunung Trus

Madi dan membina *checking station* di Sinua Sook. Projek ini telah disiapkan dan diserahkan kepada pengurusan Jabatan Perhutanan Sabah pada 20 Disember 2013.

Untuk makluman Yang Berhormat juga, Gunung Trusmadi adalah merupakan produk pelancongan utama bagi salah satu kluster yang akan dibangunkan iaitu Kluster Ekopelancongan Kota Kinabalu-Tambunan-Crocker Range Park-Keningau-Tenom yang merangkumi produk ekopelancongan terkenal lain seperti Kipandi Butterfly Park, Tamu Keningau, Keningau Craft Centre, Sabah Agriculture Park dan Gunung Senagang. Menerusi pembangunan kluster ekopelancongan ini, aktiviti ekopelancongan di Gunung Trusmadi dan kawasan sekitarnya akan dapat dibangunkan secara holistik dan meliputi inisiatif *community based tourism* (CBT) dalam kluster tersebut

Secara umumnya bagi cadangan pembangunan projek pelancongan yang akan datang terutama sekali di Gunung Trusmadi, Kementerian ini sentiasa bekerjasama dengan Agensi Negeri terutama sekali Kementerian Pelancongan, Kebudayaan dan Alam Sekitar Negeri Sabah (KPKAS) dalam mempertimbangkan sebarang cadangan pembangunan pelancongan domestik dan antarabangsa di Negeri Sabah bagi memastikan produk pelancongan di Malaysia dapat dibangunkan dan dapat memberi manfaat kepada masyarakat tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATIN PADUKA DR. TAN YEE KEW  
[ WANGSA MAJU ]**

**TARIKH : 11 NOVEMBER 2019 [ ISNIN ]**

**SOALAN NO. 9**

Minta **MENTERI PERUMAHAN DAN KERAJAAN TEMPATAN** menyatakan kaedah terbaik/inisiatif untuk mengatasi isu vandalisme dan kerosakan kemudahan terutamanya di apartment kos rendah yang masih berterusan dan membimbangkan.

**JAWAPAN**

Tuan Yang di-Pertua,

1. Untuk makluman Yang Berhormat, isu vandalisme dan kerosakan kemudahan terutamanya di apartmen kos rendah sentiasa menjadi perhatian dan perlu ditangani dengan bijak dan bersepadu oleh semua pihak.
2. Antara kaedah penyelesaian yang diambil oleh Kementerian Perumahan dan Kerajaan Tempatan (KPKT) untuk menangani isu vandalisme ini adalah dengan menggubal Dasar Komuniti Negara (DKOMN) yang bertujuan untuk menangani isu sosial perumahan di peringkat komuniti setempat, khususnya di kawasan perumahan berstrata kos rendah di seluruh negara.
3. Objektif utama DKOMN adalah untuk mendayaupayakan (*empowering*) komuniti setempat supaya boleh melibatkan diri secara aktif



dalam pengurusan dan penyelenggaraan harta awam serta harta bersama yang merupakan sebahagian daripada tempat tinggal mereka. Ini adalah selaras dengan Kluster 3 DKOMN di bawah Strategi 3.1 dan 3.3 di mana Kerajaan ingin memastikan persekitaran hidup yang selamat dan terjamin serta memperkukuh jalinan kerjasama sosial antara komuniti dengan pihak berkaitan. Perkara ini juga adalah sebagai usaha untuk memastikan isu keselamatan diberi keutamaan di apartmen kos rendah khususnya Program Perumahan Rakyat (PPR).

4. Bagi pengisian penghuni di PPR baharu, KPKT telah/akan melaksanakan ceramah/kursus untuk melatih penghuni bagaimana menguruskan dan mengekalkan kebersihan persekitaran bangunan serta kemudahan seperti lif, tangga dan sebagainya. Program ini telah dilaksanakan pertama kalinya di PPR Kota Bharu dan program ini akan terus dilaksanakan di semua PPR baharu kelak.

5. Untuk makluman Yang Berhormat juga, Kerajaan tidak akan dapat menyelesaikan isu vandalisme dan kerosakan kemudahan di apartmen kos rendah tanpa kerjasama semua pihak terutamanya penghuni yang tinggal di perumahan berstrata kos rendah awam dan swasta serta komuniti setempat. Selain itu, pihak pengurusan sama ada pengurus harta yang dilantik oleh Pihak Berkuasa Negeri (PBN) dan Badan Pengurusan Bersama (JMB)/ Perbadanan Pengurusan (MC) juga perlu memainkan peranan dalam memastikan kemudahan bersama dijaga dengan baik. Antara inisiatif yang boleh diambil adalah seperti penggunaan khidmat pengawal keselamatan dan pemasangan kamera litar tertutup (CCTV).

6. Selain itu, pihak pengurusan (pengurus harta/JMB/MC) juga boleh mengadakan kerjasama dengan pihak Polis Diraja Malaysia (PDRM) sebagai inisiatif untuk menangani isu vandalisme dan kerosakan kemudahan di apartmen kos rendah. Mana-mana individu yang terlibat dengan vandalisme boleh didakwa melakukan kesalahan khianat di bawah Seksyen 425 Kanun Keseksaan [*Akta 574*] dan seterusnya boleh dihukum penjara sehingga 5 tahun maksimum atau denda atau kedua-duanya sekali di bawah Seksyen 426 [*Akta 574*] Kanun Keseksaan jika disabit kesalahan.

7. Penglibatan dan kerjasama penduduk juga amat penting untuk membantu pihak pengurusan (pengurus harta/JMB/MC) menyelesaikan isu vandalisme dan kerosakan kemudahan. Penduduk boleh mengambil inisiatif dengan melaksanakan kaedah rondaan malam secara berjadual. Kaedah ini sedikit sebanyak akan membantu pihak pengurusan untuk menangani isu vandalisme dan kerosakan kemudahan.

8. Akhir sekali, kerjasama semua pihak amat diharapkan bagi menjayakan inisiatif/kaedah yang dinyatakan di atas dan seterusnya dapat menangani isu vandalisme dan kerosakan kemudahan di apartmen kos rendah yang masih berterusan dan membimbangkan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**  
**DARIPADA : YB TUAN HAJI HASBI BIN HAJI HABIBOLLAH**  
**KAWASAN : LIMBANG**  
**TARIKH : 11 NOVEMBER 2019 (ISNIN)**

**SOALAN :**

**YB TUAN HAJI HASBI BIN HAJI HABIBOLLAH** minta **MENTERI KERJA RAYA** menyatakan memandangkan Lebuhraya Borneo Utara (LBU) fasa dua sudah ditangguhkan dapatkah Kerajaan memberi peruntukan untuk membaiki pulih dan menaik taraf jalan persekutuan utama di daerah Limbang, Lawas yang merupakan jalan penghubung utama dari Kuching ke Kota Kinabalu yang sudah semakin reput dan membahayakan pengguna.

**JAWAPAN :**

Tuan Yang Di-Pertua,

Kementerian ini mengambil maklum berkenaan keadaan jalan Persekutuan di daerah Limbang dan Lawas. Untuk makluman Yang Di Pertua, jumlah panjang jalan Persekutuan di Bahagian Limbang yang disenggara oleh syarikat konsesi adalah sepanjang 117.200 km. Adalah dianggarkan sebanyak RM 3.8 juta setiap tahun diperuntukkan oleh Kementerian ini untuk melaksanakan program penyenggaraan rutin. Kementerian juga telah membelanjakan sebanyak RM19.48 juta untuk penyenggaraan berkala pavemen bagi tempoh tahun 2016 hingga 2019.

Untuk makluman Ahli Yang Berhormat, pada masa sekarang, Kerajaan tiada perancangan untuk menaiktaraf jalan persekutuan utama di daerah Limbang dan Lawas yang merupakan jalan penghubung utama dari Kuching ke Kota Kinabalu. Penambahbaikan keadaan jalan akan dilaksanakan melalui kerja-kerja berkala pavemen sahaja.

Untuk makluman Ahli Berhormat juga, pihak Kerajaan telah pun meluluskan Projek Sarawak - Sabah Link Road (SSLR) Pakej 1 yang melibatkan pembinaan jalan sepanjang 90 km yang akan menghubungkan Lawas ke Kg. Pa' Berunut.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS (2019)**

**PERTANYAAN : LISAN**

**DARIPADA : YB. TUAN AHMAD BIN HASSAN [ PAPAR ]**

**TARIKH : 11 NOVEMBER 2019**

**SOALAN**

Minta **MENTERI PELANCONGAN, SENI DAN BUDAYA** menyatakan apakah tindakan yang diambil oleh Kementerian terhadap kematian 2 pelancong China dan seorang jurulatih yang sedang menyelam disebabkan penggunaan bom ikan di kawasan tersebut oleh nelayan yang tidak bertanggungjawab.

**JAWAPAN**

Tuan Yang di-Pertua,

Untuk makluman Ahli Yang Berhormat, Kementerian Pelancongan, Seni dan Budaya (MOTAC) tidak melesenkan penyelam ataupun mempunyai bidang kuasa untuk melaksanakan operasi penguatkuasaan ke atas kegiatan bom ikan di sekeliling kawasan perairan Sabah. Pengurusan dan pentadbiran kawasan marin Sabah juga adalah dibawah bidang kuasa Taman-Taman Sabah.

Walaubagaimanapun MOTAC sedia memberi kerjasama kepada Polis Diraja Malaysia, Agensi Penguatkuasaan Maritim Malaysia, dan agensi penguatkuasaan yang lain dalam inisiatif membanteras kegiatan pengeboman ikan oleh nelayan yang tidak bertanggungjawab.

MOTAC melalui Pejabat MOTAC Negeri Sabah juga di dalam proses merangka SOP baru di bawah ISO21101:2014 Sistem Pengurusan Keselamatan-Pelancongan Kembara di dalam usaha

meningkatkan lagi mutu kualiti perkhidmatan oleh pengendali aktiviti skuba. Kerjasama bersama Jabatan Standard Malaysia ini dijangka akan dapat meningkatkan lagi kepekaan pengendali aktiviti skuba berkaitan isu keselamatan pelancong serta langkah-langkah untuk mengurangkan risiko bagi perkara-perkara yang tidak diingini berlaku.

Di samping itu, MOTAC juga mengadakan sesi keterlibatan dari semasa ke semasa bersama Persatuan Pelancongan Semporna dan Persatuan Penyelam Profesional Semporna bagi menjadikan penyelam-penyelam berlesen ini sebagai mata dan telinga bagi memantau aktiviti pengeboman ikan untuk dilaporkan kepada pihak berkuasa. Diharapkan agar usaha ini dapat membantu pihak berkuasa di dalam mengurangkan aktiviti pengeboman ikan di Daerah Semporna dan Sabah secara umumnya.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN RUBIAH BINTI HAJI WANG  
[ KOTA SAMARAHAN ]**

**TARIKH : 11 NOVEMBER 2019 (ISNIN)**

**SOALAN**

**PUAN RUBIAH BINTI HAJI WANG [ KOTA SAMARAHAN ]** minta **MENTERI KOMUNIKASI DAN MULTIMEDIA** menyatakan usaha Kerajaan Persekutuan dalam menambah baik jaringan jalur lebar terutamanya di kawasan luar bandar di Sarawak.

**JAWAPAN**

Tuan Yang di-Pertua,

1. Untuk makluman Ahli Yang Berhormat, melalui inisiatif yang dibiayai menerusi Kumpulan Wang Pemberian Perkhidmatan Sejagat (PPS), Peluasan Liputan Jalur Lebar Mudah Alih yang merangkumi pembinaan menara komunikasi baharu dan penaiktarafan menara komunikasi sedia ada dengan perkhidmatan jalur lebar mudah alih giat dilaksanakan. Setakat September 2019, sebanyak 2,426 menara komunikasi baharu telah siap beroperasi di kawasan luar bandar di seluruh negara dan terdapat 220 menara komunikasi baharu masih di peringkat pelaksanaan. Daripada jumlah tersebut, sebanyak 608 menara komunikasi baharu telah siap beroperasi di Negeri Sarawak dan terdapat 32 menara lagi masih di peringkat pelaksanaan.

**SOALAN NO : 12**

2. Pihak SKMM telah menaiktaraf sebanyak 5,130 lokasi menara kepada perkhidmatan 3G dan 4G, ini termasuklah 1,014 lokasi bagi Negeri Sarawak. Manakala sebanyak 49 lokasi menara masih lagi dalam peringkat penaiktarafan di seluruh negara.

<b>Inisiatif Kerajaan</b>	<b>Siap (Seluruh Negara)</b>	<b>Dalam Pelaksanaan (Seluruh Negara)</b>	<b>Siap (Sarawak)</b>	<b>Dalam Pelaksanaan (Sarawak)</b>
Pembinaan Menara Komunikasi Baharu	2,426	220	608	32
Penaiktarafan Menara Sedia Ada	5,130	49	1,014	-

3. Selain itu, bagi inisiatif berkaitan peluasan Jalur Lebar Talian Tetap yang menyediakan perkhidmatan jalur lebar berkelajuan tinggi di kawasan pinggir dan luar bandar; lebih dari 620 ribu sambungan telah tersedia yang melibatkan penaiktarafan 572 ibusawat di seluruh negara, manakala baki 60 ribu sambungan masih dalam peringkat pelaksanaan yang dijangka siap secara berperingkat pada tahun 2019. Ini termasuklah lebih 29 ribu sambungan telah siap di Negeri Sarawak dan baki 8 ribu sambungan dalam peringkat pelaksanaan.

<b>Inisiatif Kerajaan</b>	<b>Siap (Seluruh Negara)</b>	<b>Dalam Pelaksanaan (Seluruh Negara)</b>	<b>Siap (Sarawak)</b>	<b>Dalam Pelaksanaan (Sarawak)</b>
Jalur Lebar Talian Tetap Luar Bandar dan Pinggir Bandar	620 ribu sambungan  572 Ibu Sawat	60 ribu sambungan	29 ribu sambungan	8 ribu sambungan



## SOALAN NO : 12

4. Antara inisiatif lain oleh Kerajaan untuk menyokong pemberi perkhidmatan untuk menyediakan perkhidmatan 4G adalah projek rangkaian teras gentian optik. Di Negeri Sarawak, sepanjang 1,237 km gentian optik telah siap beroperasi dan digunakan untuk penyediaan perkhidmatan 4G.

5. Untuk memastikan liputan jalur lebar dapat disediakan kepada hampir semua penduduk, Pelan Gentian Optik dan Kesalinghubungan Negara (atau National Fiberisation and Connectivity Plan, ("NFCP")) mensasarkan 98% kawasan berpenduduk di Malaysia akan mendapat kelajuan purata 30Mbps menjelang tahun 2023 dengan menggunakan teknologi yang bersesuaian di seluruh negara.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN JUGAH ANAK MUYANG  
@ TAMBAT [ LUBOK ANTU ]**

**TARIKH : 11 NOVEMBER 2019 [ ISNIN ]**

**SOALAN NO. 13**

Minta **MENTERI PERUMAHAN DAN KERAJAAN TEMPATAN** menyatakan adakah perancangan untuk membina Balai Bomba di kawasan P.203 Lubok Antu memandangkan kerap kali berlakunya kebakaran rumah panjang khususnya dan balai bomba juga agak jauh dari daerah yang terdekat.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) mengambil maklum terhadap keperluan balai bomba di kawasan Lubok Antu, Sarawak. Pada masa ini, kawasan Lubok Antu mendapat perlindungan kebakaran dari Balai Bomba dan Penyelamat Sri Aman dan Betong dengan jarak 80 kilometer.
2. Khidmat kebombaan di kawasan tersebut juga dibantu oleh Pasukan Bomba Sukarela (PBS) Lubok Antu dengan kekuatan 41 anggota dan sebuah kenderaan bomba sukarela Proton Arena yang dilengkapi dengan pam angkut. Turut memberi sokongan kepada PBS Lubok Antu adalah PBS Engkelili dengan kekuatan 15 orang pada jarak 30 kilometer.
3. Untuk makluman Yang Berhormat juga, KPKT telah mengenal pasti tapak yang bersesuaian bagi tujuan pembinaan balai bomba dan proses perolehan tanah dijangka akan dapat diselesaikan pada tahun 2020. Sehubungan itu, KPKT akan memohon projek balai bomba di parlimen Lubok Antu untuk dimasukkan dalam RMKe-12 Tahun 2021.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN ARTHUR JOSEPH KURUP  
[ PENSIANGAN ]**

**TARIKH : 11 NOVEMBER 2019 (ISNIN)**

**SOALAN NO. 14**

**TUAN ARTHUR JOSEPH KURUP [ PENSIANGAN ]** minta **MENTERI KESIHATAN** menyatakan bilakah kuarters yang baharu di Klinik Kesihatan Nabawan akan siap dibina dan boleh diguna oleh anggota klinik.

**JAWAPAN**

**Tuan Yang di-Pertua,**

Projek Klinik Kesihatan Jenis 4 (KK4) dengan X-Ray dan Kuarters, Nabawan telah diluluskan oleh Kerajaan untuk dilaksanakan di bawah Rancangan Malaysia Kesembilan (RMKe-9). Projek ini dilaksanakan dalam dua (2) Fasa di mana Fasa 1 melibatkan Kerja Pembinaan Klinik Kesihatan dan Fasa 2 melibatkan Kerja Pembinaan Kuarters.

Fasa 1 projek ini telah siap sepenuhnya pada 5 September 2016 dan Klinik Kesihatan Nabawan telah memulakan operasi pada 5 Disember 2016. Manakala Fasa 2 projek ini telah memulakan Fasa Pembinaan pada 25 November 2016 dan dijangka siap pada November 2019. Kemajuan Fizikal Sebenar projek adalah 94.30% berbanding jadual iaitu, 99.08%.

Untuk makluman YB Pensiangan, Kementerian Kesihatan Malaysia (KKM) sentiasa berusaha menambahbaik dari semasa ke semasa penyampaian perkhidmatan kesihatan demi kesejahteraan seluruh rakyat Malaysia amnya. Kementerian ini bersama Jabatan Kerja Raya dan Agensi-agensi Kerajaan yang lain sentiasa bekerjasama dengan erat bagi memastikan Fasa 2 projek ini disiap sepenuhnya.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS (2019)**

**PERTANYAAN : LISAN**

**DARIPADA : YB PUAN JUNE LEOW HSIAD HUI  
[ HULU SELANGOR ]**

**TARIKH : 11 NOVEMBER 2019**

**SOALAN**

Minta **MENTERI PELANCONGAN, SENI DAN BUDAYA** menyatakan usaha-usaha Kerajaan bagi mempromosikan Tahun Melawat Malaysia 2020 (TMM2020) di peringkat antarabangsa dan bagaimana sektor swasta boleh menyumbang bagi menjayakan kempen TMM2020.

**JAWAPAN**

Tuan Yang di-Pertua,

Kementerian Pelancongan, Seni dan Budaya (MOTAC) melalui pejabat-pejabat Tourism Malaysia di luar negara sentiasa aktif mempromosikan Malaysia melalui usaha-usaha berikut:-

1) Memperkukuhkan penyertaan Malaysia di pameran-pameran pelancongan utama peringkat antarabangsa seperti World Travel Mart (WTM) di London, Internationale Tourismus-Börse (ITB) di Berlin, Top Resa di Perancis, Flight Center Travel Expo di New Zealand, ASEAN Tourism Forum (ATF) di Vietnam, China International Tourism Industry Expo (CITIE) di China, South Asian Travel & Tourism Exhibition (SATTE) di India, India International Travel & Tourism (ITTT) di India, Arab Travel Mart (ATM) di UAE dan Hana Tour Busan International Travel Show di Korea Selatan;

2) Menganjur Program Mega-Fam untuk agensi -agensi pelancongan, media, dan bloggers antarabangsa ke Malaysia. Wakil media akan menerbitkan artikel mengenai Malaysia di majalah dan akhbar di pasaran, manakala wakil dari agensi pelancongan pula akan membangunkan pakej lawatan baru ke Malaysia. Sebanyak 7 program suaikenal (Mega-Fam) dengan jumlah nilai publisiti mencapai hampir RM5 juta telah dilaksanakan dari Januari hingga September 2019 yang melibatkan pengamal media dan agensi antarabangsa. Selain itu, bagi tempoh Mei - September 2019 sebanyak 10 program utama telah diadakan dengan penglibatan media tempatan dan antarabangsa untuk mempromosikan Visit Malaysia 2020 yang telah menjana lebih 23 juta capaian di media sosial;

3) Menjalankan kempen pengiklanan melalui media cetak, elektronik papan tanda (*billboard*) serta pemasaran digital di pasaran-pasaran terpilih di luar negara. Diantaranya, pengiklanan VM2020 turut dilaksanakan melalui medium *Out Of Home* (OOH) di United Kingdom pada panel keretapi, badan teksi (London Cab), badan bas dan cross track panels manakala bagi pasaran Jepun, logo VM2020 dipasang pada billboard di stesen keretapi Shinagawa dan di flight information board Lapangan Terbang Fukuoka. Sebanyak enam panel billboard VM2020 turut dipasang di Lapangan Terbang Sabiha Gokcen, Istanbul yang menerima 34 juta penumpang/ passengers domestik dan antarabangsa pada tahun 2018; dan

4) Kempen VM2020 secara digital juga telah dilaksanakan dengan Expedia bagi pasaran Australia, Amerika Syarikat dan Jepun yang dijangka akan meningkatkan tempahan pakej percutian ke Malaysia dengan sasaran peningkatan seramai 25,400 pelancong dan 20 juta *impressions* dari pasaran tersebut. Kempen bersepadu ini akan mempromosikan Malaysia sebagai destinasi pelancongan terkemuka sempena VM2020 kepada lebih 750 juta pengunjung Expedia di seluruh dunia.

Tuan Yang di-Pertua,

Untuk memastikan kejayaan kempen ini, kerjasama turut dijalin dengan pihak swasta bagi memastikan hebahan publisiti dan promosi secara menyeluruh VM2020 dilaksana di semua peringkat. Diantaranya, kerjasama strategik dengan MasWings, Malaysia Airlines, Air Asia, Firefly, Malindo Air, Malaysia Airports Berhad dan Sharp (M) Electronics. Pelancaran 'livery' di badan pesawat keempat-empat syarikat penerbangan tersebut telah diadakan pada 22 Julai 2019. Logo VM2020 juga dipasang di badan-badan pesawat dan ruang dalam pesawat iaitu *Upper Overhead Cabin*, *Back seat meal tray*, *overhead locker* dan majalah *inflight*. Manakala, kerjasama dengan Sharp (M) dijangka akan meningkatkan 'visibility' kempen VM2020 melalui teknologi 8K dengan tayangan video promosi Malaysia di 10,000 panel TV 8K sekitar Malaysia dan 200,000 panel TV 8K di China, India, Jepun, Taiwan, dan ASEAN. Selain itu, kerjasama dengan Telekom Malaysia, Astro, Media Prima dan lain-lain pihak berkepentingan sedang dalam perancangan oleh Tourism Malaysia.

Memetik kata-kata YAB Perdana Menteri bahawa kempen VM2020 merupakan satu misi nasional dengan penglibatan semua lapisan masyarakat, maka saya menyeru kepada semua termasuk pihak industri, kementerian-kementerian dan kerajaan negeri untuk sama-sama menjayakan kempen ini sebagai satu tanggungjawab bersama.

Untuk makluman semua Ahli Yang Berhormat sekalian, satu sesi taklimat khas berkenaan VM2020 akan diadakan pada 19 November 2019.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' DR. MOHD KHAIRUDDIN BIN AMAN RAZALI**  
**[KUALA NERUS]**  
**TARIKH : 11 NOVEMBER 2019 (ISNIN)**

**SOALAN NO. 16**

**Y.B. DATO' DR. MOHD KHAIRUDDIN BIN AMAN RAZALI [ KUALA NERUS ]**  
minta **MENTERI KEWANGAN** menyatakan jumlah terkini hutang dan liabiliti Kerajaan serta nilai bon dan sukuk yang diterbitkan oleh Kerajaan dari Jun 2018 hingga Jun 2019.

**JAWAPAN**

Tuan Yang di-Pertua,

Sehingga akhir-Jun 2019, **hutang langsung Kerajaan Persekutuan** adalah **RM799.1 bilion** atau **52.7%** daripada KDNK, berbanding RM725.2 bilion atau 50.1% daripada KDNK pada akhir-Jun 2018. Bagi tempoh Julai 2018 sehingga Jun 2019, Kerajaan telah membuat pinjaman kasar sebanyak RM138.8 bilion yang mana RM68.8 bilion merupakan terbitan Terbitan Pelaburan Kerajaan (MGII), RM49.5 bilion terbitan Sekuriti Kerajaan Malaysia (MGS), RM13 bilion terbitan Bil Perbendaharaan dan RM7.5 bilion terbitan luar pesisir meliputi bon Samurai dan pinjaman projek.

Selain hutang langsung, Kerajaan juga mempunyai **komitmen jaminan yang perlu ditanggung dan dibiayai Kerajaan** yang terdiri daripada tanggungan hutang sebahagian syarikat berkaitan Kerajaan yang menerima Jaminan Kerajaan bagi melaksanakan projek infrastruktur pengangkutan awam dan utiliti. Di samping itu, Kerajaan juga menanggung **hutang syarikat 1MDB** serta **liabiliti lain** seperti bayaran pajakan kewangan (*finance lease*) bagi tempoh 2018 – 2047 ke atas projek yang dilaksanakan secara *Public-Private Partnership* (PPP) di bawah Unit Kerjasama Awam Swasta (UKAS), projek yang dilaksanakan secara *off-budget* melalui inisiatif pembiayaan swasta (PFI) dan Pembinaan BLT Sdn Bhd di bawah Kementerian Kewangan. Bayaran *finance lease* ini adalah berdasarkan perjanjian konsesi yang ditandatangani melibatkan obligasi tunai Kerajaan sehingga tahun 2047. Secara keseluruhannya, **jumlah keseluruhan komitmen hutang dan liabiliti Kerajaan** dianggarkan berjumlah **RM1.1 trilion**.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 11 NOVEMBER 2019 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan cadangan bagi membina rumah mampu milik di RPT Batu 1 Jalan Lintang untuk menyelesaikan isu setinggan.

**JAWAPAN**

Tuan Yang di-Pertua,

1. Untuk makluman Yang Berhormat, salah satu komponen di dalam Dasar Perumahan Mampu Milik Negara (DRMM) yang telah dilancarkan pada 11 Mei 2019 adalah mengenai kawalan pembangunan rumah mampu milik. Perkara ini digariskan dalam DRMM sebagai panduan kepada kerajaan negeri / Pihak Berkuasa Tempatan (PBT) dalam mengawal selia dan memantau penyediaan rumah mampu milik melalui kelulusan Kebenaran Merancang pembangunan perumahan dan hartanah. Manakala harga jualan bagi pasaran bebas adalah berdasarkan harga permintaan dan penawaran.

2. Berdasarkan polisi kawalan pembangunan rumah mampu milik, Kerajaan negeri dan PBT boleh menentukan harga jualan berdasarkan 2 faktor iaitu kemampuan pemilikan oleh penduduk setempat dan pendapatan penengah atau kemampuan penduduk.

3. Kelulusan Kebenaran Merancang dan polisi penetapan kawalan pembangunan rumah mampu milik ini adalah di bawah bidang kuasa Kerajaan negeri. Maka sebarang pindaan, rayuan pengurangan peratusan penyediaan, penukaran dan perpindahan serta pindaan harga rumah mampu milik adalah tertakluk kepada pertimbangan Majlis Mesyuarat Kerajaan Negeri.

4. Untuk makluman Yang Berhormat juga, antara **usaha Kerajaan untuk menyelesaikan isu setinggian** serta memenuhi keperluan tempat kediaman bagi golongan berpendapatan rendah di negara ini adalah dengan **membina rumah Rumah Mampu Milik** di bawah Program Perumahan Rakyat (PPR). Sehingga 6 November 2019, sebanyak 137 projek PPR (90,179 unit) telah berjaya disiapkan, manakala 37 projek PPR (15,240 unit) adalah dalam pembinaan dan 22 projek (9,233 unit) dalam pelbagai peringkat perancangan bagi seluruh Negara.

5. **Bagi RPT Batu 1 Jalan Lintang, setakat ini belum ada perancangan untuk membina PPR di kawasan tersebut.** Walau bagaimanapun, cadangan pihak Yang Berhormat amat dialukan untuk mengemukakan tapak yang sesuai melalui Kerajaan Negeri bagi urusan pertimbangan lanjut di peringkat Kementerian Perumahan dan Kerajaan Tempatan (KPKT).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATIN MASTURA BINTI MOHD YAZID  
[ KUALA KANGSAR ]**

**TARIKH : 11 NOVEMBER 2019 (ISNIN)**

**SOALAN NO. 18**

**DATIN MASTURA BINTI MOHD YAZID [ KUALA KANGSAR ]** minta **MENTERI KESIHATAN** menyatakan inisiatif berterusan Kementerian dalam menangani stigma terhadap pesakit-pesakit berkaitan kesihatan mental dalam kalangan masyarakat, dan apakah statistik golongan penjawat awam yang mengalami masalah kesihatan mental untuk tempoh 5 tahun yang lepas.

**JAWAPAN**

**Tuan Yang di-Pertua,**

Stigma dan salah faham dalam kalangan masyarakat telah menjadi salah satu halangan yang paling besar untuk seseorang yang mengalami penyakit mental mendapatkan bantuan profesional yang amat mereka perlukan. Antara inisiatif yang diambil oleh Kerajaan bagi mengurangkan stigma masyarakat terhadap pesakit mental adalah melalui;

- (a) Kementerian Kesihatan Malaysia (KKM) telah melancarkan satu kempen kesedaran nasional Let's TALK Minda Sihat - **#letstalkmindasihat** yang bertujuan membina kesedaran dan mengatasi stigma terhadap kesihatan mental. Kempen ini akan dikendalikan secara berkala sempena bulan kesihatan mental pada bulan Oktober setiap tahun. Ia akan melibatkan beberapa agensi kerajaan serta pihak NGO yang akan berkolaborasi bagi

menjalankan aktiviti-aktiviti kesedaran kesihatan mental di seluruh negara secara berterusan.

- (b) Aktiviti-aktiviti kesedaran kesihatan mental diterapkan bersama kempen-kempen Cara Hidup Sihat yang memfokuskan kepada cara menangani stres dan kepentingan rawatan jika stress berterusan;
- (c) Aktiviti-aktiviti promosi kesihatan mental yang meliputi kem-kem Kesihatan, pameran, ceramah, dialog dan forum dilaksanakan di peringkat komuniti; dan
- (d) Kesedaran terhadap masalah kesihatan mental juga diterapkan dalam program KOSPEN (Komuniti Sihat Pembina Negara) dalam mempromosikan kesihatan mental dan mencegah penyakit mental melalui latihan kemahiran daya tindak dan aktiviti pemerkasaan komuniti. Pemerkasaan ini juga di lakukan di tempat kerja melalui program KOSPEN PLUS.

**Tuan Yang Dipertua,**

Kajian *National Health Morbidity Survey* (NHMS) yang dikendalikan oleh KKM pada 2015 mendapati prevalen masalah kesihatan mental di kalangan pejawat awam adalah 24.6% berbanding pekerja swasta iaitu 29.3%. Masalah kesihatan mental berlaku apabila seseorang individu mengalami gangguan emosi atau perasaan yang boleh mengakibatkan fungsi kehidupan seharian tidak berada pada tahap optima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN STEVEN CHOONG SHIAU**  
**YOON [ TEBRAU ]**  
**TARIKH : 11 NOVEMBER 2019 (ISNIN)**

**SOALAN NO. 19**

**Y.B. TUAN STEVEN CHOONG SHIAU YOON [ TEBRAU ]** minta **MENTERI KEWANGAN** menyatakan sebab-sebab mengapa kawasan perindustrian Tanjung Langsat dalam Parlimen Tebrau kurang menarik kepada pelabur-pelabur asing dan tempatan. Adakah ianya kerana kemudahan infrastruktur di Pelabuhan Tanjung Langsat tidak dapat menampung penambahan kapasiti kargo pepejal.

**JAWAPAN**

Tuan Yang di-Pertua,

Kompleks Perindustrian Tanjung Langsat (KPTL) telah mula dibangunkan oleh Johor Corporation pada tahun 1995 dengan keluasan dibangunkan 5,004 ekar. Kompleks Perindustrian ini dibangunkan bertujuan memenuhi keperluan industri berat dan industri yang memerlukan kemudahan pelabuhan. Pelabuhan Tanjung Langsat menawarkan pengguna kemudahan pengendalian kargo cecair di 7 dermaga dengan kapasiti maksima 30 juta metrik tan setahun dan kargo pukal kering di 2 dermaga yang mempunyai kapasiti 2 juta metrik tan setahun. Sehingga 30 September 2019, jumlah kargo pukal kering yang dikendalikan adalah hampir 400,000 metrik tan, bermakna jeti tersebut masih mempunyai kapasiti untuk mengendalikan kargo pukal kering yang lebih banyak. Sehingga kini, KPTL seluas 2,162.49 ekar atau 68% daripada

kawasan boleh dipajak telah berjaya dipajak kepada pelabur tempatan dan asing dengan nilai pelaburan hampir RM 28 bilion dan dapat memberi peluang pekerjaan di bidang-bidang teknikal, pentadbiran dan kewangan serta peluang perniagaan dan perkhidmatan sokongan. Sambutan terhadap KPTL amat menggalakkan walaupun dalam keadaan ekonomi yang tidak menentu. Walau bagaimanapun, KPTL sentiasa berhati-hati di dalam memilih pelabur yang ingin melabur di situ dengan memilih jenis pelaburan dan latar belakang pelabur demi memastikan manfaat yang diperolehi oleh Negeri Johor khasnya dan Negara amnya adalah pada tahap yang optimum.

Berikut ialah data pajakan tanah, nilai pelaburan dan peluang pekerjaan yang dijana untuk KPTL bagi tempoh 2016 – September 2019:

<b>TAHUN</b>	<b>LUAS (EKAR)</b>	<b>NILAI PELABURAN (RM JUTA)</b>	<b>PELUANG PEKERJAAN</b>
<b>2016</b>	84.624	1,354.0	584
<b>2017</b>	54.404	396.40	333
<b>2018</b>	120.299	748.40	1,118
<b>Januari – September 2019</b>	12.264	116.70	172
<b>JUMLAH</b>	<b>271.591</b>	<b>2,615.50</b>	<b>2,207</b>

Bagi tempoh Januari – Ogos 2019 sahaja, Johor Corporation telah menerima 59 pertanyaan dari bakal pelabur untuk KPTL berbanding 150 pertanyaan yang diterima untuk tanah-tanah industri milik Johor Corporation. Pihak Johor Corporation juga sedang berbincang dengan beberapa pelabur berpotensi dari dalam dan luar negara bagi menempatkan operasi mereka di KPTL. Data di atas menunjukkan KPTL masih menjadi pilihan pelabur tempatan dan asing.

Pihak Kerajaan Negeri Johor dan Johor Corporation akan terus mempertingkatkan aktiviti promosi dengan menyertai Misi Pelaburan keluar Negara, seminar, pameran dan lawatan ke pelabur-pelabur berpotensi bagi menarik pelaburan asing dan tempatan ke KPTL dan kawasan-kawasan industri milik Johor Corporation.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' MOHD. NIZAR BIN HAJI ZAKARIA  
[ PARIT ]**

**TARIKH : 11 NOVEMBER 2019 [ ISNIN ]**

**SOALAN NO. 20**

Minta **MENTERI PERUMAHAN DAN KERAJAAN TEMPATAN**  
menyatakan :-

(a) apakah rasionalnya cadangan penganjuran Kempen Pemilikan Rumah (HOC) kepada warganegara asing bagi menyelesaikan isu lambakan rumah tidak terjual; dan

(b) apakah terdapat sebarang usaha serta perancangan oleh Kementerian bagi membina lebih banyak rumah yang sesuai dengan kemampuan gaji rakyat di Malaysia.

**JAWAPAN**

Tuan Yang di-Pertua,

**Jawapan (a)**

1. Untuk makluman Yang Berhormat, penjualan rumah kepada warganegara asing adalah merujuk kepada usaha Kerajaan membantu

mempromosikan program Malaysia My Second Home (MM2H) melalui kerjasama dengan Kementerian Pelancongan, Seni dan Budaya Malaysia (MOTAC).

2. Home Ownership Campaign (HOC) adalah program yang diperuntukkan kepada rakyat Malaysia **sahaja** bagi memiliki kediaman dengan insentif yang diberikan oleh Kerajaan dan diskaun daripada pihak pemaju.

3. MM2H merupakan satu inisiatif Kerajaan Malaysia untuk menarik dan menawarkan peluang kepada warganegara asing yang mempunyai kemampuan kewangan yang tinggi serta memenuhi syarat untuk menetap dan merancakkan ekonomi di Malaysia melalui subsektor pelaburan, hartanah, pendidikan, perubatan dan automobil. Warga asing yang berjaya menyertai Program MM2H akan diberikan Pas Lawatan Sosial dengan Visa Masuk Berulang Kali untuk tempoh 10 tahun dan boleh diperbaharui.

4. Berdasarkan data Pusat Maklumat Harta Tanah Negara Suku Kedua 2019, terdapat 4,213 (12.8%) dengan nilai RM8.3 bilion rumah mewah tidak terjual yang berharga RM1 juta dan ke atas di negara ini. Sehubungan itu, penjualan rumah mewah kepada warga asing ini dapat mengurangkan lambakan unit rumah sedia ada serta menggalakkan pertumbuhan ekonomi secara keseluruhannya.

**Jawapan (b)**

1. Untuk makluman Yang Berhormat, di bawah Dasar Rumah Mampu Milik (DRMM), Kerajaan telah mengambil pendekatan melalui kaedah median *multiple* bagi menentukan harga rumah mampu milik. Harga rumah yang mampu dimiliki adalah tiga kali ganda median pendapatan isi rumah setahun mengikut lokasi/negeri. Kaedah ini merupakan piawaian antarabangsa bagi memastikan harga rumah adalah sesuai dengan kemampuan pendapatan rakyat. Selain itu, Kerajaan juga telah

mengambil pelbagai inisiatif meningkatkan penyediaan rumah mampu milik iaitu melalui:

- (i) pelaksanaan program 1 juta Rumah Mampu Milik seperti dalam janji Kerajaan;
- (ii) kerjasama daripada Kerajaan Negeri untuk menyediakan tanah yang strategik dengan infrastruktur yang lengkap memandangkan tanah merupakan elemen penting dalam pembinaan rumah;
- (iii) melaksanakan perancangan pembangunan RMM secara *Request for Proposal* (RFP), bagi memastikan pembinaan rumah mampu milik pada kos yang optimum tanpa melibatkan peruntukan kewangan daripada Kerajaan; dan
- (iv) Kementerian Perumahan dan Kerajaan Tempatan (KPKT) juga sedang mengkaji pembinaan rumah mampu milik di atas tanah waqaf, bagi menampung keperluan pembinaan rumah mampu milik.

2. Untuk makluman Ahli Yang Berhormat juga, perancangan penyediaan rumah mampu milik di bawah Program Perumahan Rakyat (PPR) adalah tertakluk kepada kesediaan dan kesesuaian tapak tanah milik Kerajaan Negeri untuk pembangunan PPR serta cadangan keutamaan daripada Kerajaan Negeri.

3. Jika terdapat tanah dan lokasi yang bersesuaian untuk pembangunan PPR, keperluan tersebut boleh dikemukakan terlebih dahulu kepada Kerajaan Negeri untuk tujuan penyelarasan dan cadangan tersebut boleh dipanjangkan kepada KPKT.

Sekian, terima kasih.

**PEMBERITAHUAN PERTANYAAN LISAN  
DEWAN RAKYAT MESYUARAT KETIGA,  
PENGAL KEDUA, PARLIMEN KEEMPAT BELAS**

---

**PERTANYAAN : LISAN**

**DARIPADA : YB. TUAN LARRY SOON @ LARRY SNG  
WEI SHIEN  
[JULAU]**

**TARIKH : 11 NOVEMBER 2019 (ISNIN)**

**SOALAN**

Minta **MENTERI PEMBANGUNAN USAHAWAN** menyatakan berapakah bilangan usahawan usahawan daripada masyarakat Dayak yang menerima geran keusahawanan dan apakah usaha-usaha yang dilaksanakan membantu mereka sejak perubahan tampuk kepimpinan negara pada Mei 2018.

**JAWAPAN**

Tuan Yang di-Pertua,

1. Program Keusahawanan yang disediakan oleh Kerajaan melalui Kementerian Pembangunan Usahawan menyasarkan semua peringkat lapisan masyarakat tanpa mengira kaum dan agama. Khusus bagi usahawan Bumiputera di Sarawak, Kementerian telah mengadakan **Konvensyen Memperkasakan Usahawan Bumiputera di Kuching Sarawak pada 6 September 2018** untuk mendapatkan maklum balas dan pandangan usahawan di Sarawak.

2. Seterusnya, pelbagai program keusahawanan dan bantuan pembiayaan telah disalurkan bagi membantu usahawan termasuk daripada masyarakat Dayak. Antaranya adalah:

(i) Suruhanjaya Koperasi Malaysia (SKM)

- (a) **Geran pembiayaan berjumlah RM 975 ribu kepada 18 buah koperasi Dayak** bagi tujuan pembelian peralatan, pembinaan premis perniagaan Koperasi, ubahsuai dan naik taraf kedai koperasi;
- (b) **Pinjaman Tabung Modal Pusingan (TMP) berjumlah RM 780 ribu kepada 3 koperasi Dayak** bagi tujuan pembelian bangunan kedai dan modal pusingan perniagaan.

(ii) SME Corporation (SME Corp)

- (a) **Program Peningkatan Perusahaan Bumiputera (BEEP)** - Sejak Mei 2018, sejumlah **65 geran bersamaan RM9.1 juta** telah diluluskan untuk PKS Bumiputera Sarawak meliputi khidmat nasihat, bantuan teknikal, latihan dan sokongan kewangan dalam bentuk geran bersamaan.
- (b) **Program Galakan Eksport Bumiputera (GEB)** - Sejak Mei 2018, sejumlah **4 syarikat Bumiputera Sarawak** telah diluluskan **geran bersamaan berjumlah RM51,732** bagi pelaksanaan aktiviti promosi dan peningkatan pembungkusan untuk memperluaskan pasaran ke luar negara.

(iii) MaGIC

- (a) MaGIC Sarawak telah mewujudkan kerjasama strategik dengan UITM Sarawak, UNIMAS, Swinburne University dan Curtin's University bagi melaksanakan program komuniti dan "roadshow" seperti "Youth Co-Lab", "SPARK", "Idea Lab", "Startup Weekend" dan "Social Enterprise Development" kepada lekatan

universiti dan penuntut tahun akhir universti-universiti tersebut.

- (b) MaGIC turut menjalankan program Borneo744 di Kota Kinabalu yang memberi tumpuan kepada bidang keusahawanan, kesenian dan kebudayaan. Selain itu, program **Pre-Accelerator TEGAS (Tabung Ekonomi Gagasan Anak Sarawak)** turut dilaksanakan dengan kerjasama **KOBIS (Koperasi Belia Inovatif Sarawak)** bagi menjana inovasi dan memberi pendedahan “startup” yang berinovatif.
  
- (iv) Manakala INSKEN telah melaksanakan program pembangunan modal insan menerusi latihan teknikal keusahawanan jangka pendek 2 hari 1 malam berbentuk ‘outcome-based’ dan program-program praktikal berbentuk *coaching/ mentoring* selama 4 bulan bagi membantu meningkatkan pengetahuan. Ianya bertujuan meningkatkan taraf ekonomi dan jualan perniagaan serta mewujudkan peluang pekerjaan kepada masyarakat setempat di Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI HAJI AHMAD  
BIN HAJI MASLAN [ PONTIAN ]**

**TARIKH : 11 NOVEMBER 2019 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan pemilikan rumah terkini mengikut kaum dan kategori rumah murah, sederhana dan mewah. Nyatakan langkah-langkah terperinci untuk memastikan semua rakyat terutama yang sudah berkeluarga memiliki rumah dan langkah-langkah untuk mengawal kadar sewa berpatutan kepada mereka yang belum memiliki rumah.

**JAWAPAN**

Tuan Yang di-Pertua,

1. Untuk makluman Yang Berhormat, data pemilikan rumah terkini mengikut jenis rumah yang dijana melalui data Jabatan Penilaian dan Perkhidmatan Harta Malaysia (NAPIC) adalah berdasarkan kategori Bumiputera dan Bukan Bumiputera. NAPIC tidak memiliki data pemilikan rumah mengikut kaum. Berdasarkan data pindah milik kediaman dari tahun 2016 sehingga Jun 2019, secara keseluruhan majoriti transaksi kediaman adalah dari kalangan Bukan Bumiputera. Manakala dari segi pemilikan jenis rumah, transaksi melibatkan Bumiputera adalah lebih tinggi bagi kediaman jenis teres setingkat, berkembar setingkat, flat kos

rendah dan rumah kos rendah. Pembeli Bukan Bumiputera mendominasi transaksi bagi rumah jenis berkembar 2 tingkat, rumah sesebuah, kondominium, apartmen dan rumah bandar. Perincian adalah seperti di **Lampiran A**.

2. Antara langkah Kerajaan bagi memastikan semua rakyat terutamanya yang berkeluarga memiliki rumah adalah seperti berikut:

- i) **Penyediaan 1 Juta Rumah Mampu Milik (RMM)** dalam tempoh 10 tahun;
- ii) **Skim pembiayaan kewangan fleksible** yang menawarkan pakej pinjaman menyeluruh;
- iii) **Pemanjangan tempoh pembiayaan perumahan sektor awam** di bawah Lembaga Pembiayaan Perumahan Sektor Awam (LPPSA);
- iv) **Jaminan Cagamas SRP Berhad** untuk membantu golongan muda yang berpendapatan RM3,000 sebulan dan ke bawah untuk memiliki rumah;
- v) **Diskaun Plus**, penawaran diskaun oleh pemaju perumahan dengan *zero deposit* (yang disokong oleh skim jaminan Cagamas/Skim Jaminan Kredit Perumahan); dan
- vi) **FundMyhome (Crowd Funding)**, konsep di mana rakyat boleh mendapatkan bantuan kewangan untuk membeli rumah melalui kaedah pinjaman terbuka.

3. Selain itu, selaras dengan pembentangan **Belanjawan 2020** kerajaan telah mengumumkan beberapa inisiatif perumahan seperti berikut:-



- i) **Dana Rumah Mampu Milik** bagi membantu pembeli rumah golongan berpendapatan rendah untuk membeli rumah pertama;
- ii) **Skim Pembiayaan Sewa untuk Memiliki (*Rent To Own* - RTO).**
- iii) **Skim Perumahan Belia** melalui Cagamas; dan
- iv) **Penyediaan Belanjawan sebanyak RM70 juta untuk perumahan generasi baru peneroka FELDA.**

4. Untuk makluman Yang Berhormat juga, pada masa ini di Malaysia, undang-undang khas berkaitan penyewaan kediaman masih belum wujud. Undang-undang sedia ada seperti Kanun Tanah Negara, Akta Kontrak 1950, Akta *Specific Relief* 1950 dan beberapa akta lain dilihat terlalu umum dalam menangani isu penyewaan dan peruntukan perlindungan kepada penyewa dan pemilik rumah. Oleh yang demikian, Kementerian Perumahan dan Kerajaan Tempatan (KPKT) melalui Jabatan Perumahan Negara sedang mengkaji dan merangka Akta Sewaan Kediaman atau *Residential Tenancy Act* (RTA) untuk menyediakan perundangan khusus bagi penyewa dan pemilik rumah kediaman supaya penyewaan menjadi pilihan yang berdaya maju (*viable*) kepada rakyat selain daripada pemilikan. Matlamat Akta Sewaan Kediaman ini adalah untuk menangani isu-isu penyewaan dan memberi perlindungan/hak kepada penyewa dan tuan rumah.

Sekian, terima kasih.

## BILANGAN PINDAHMILIK KEDIAMAN MENGIKUT JENIS 2016 - JUN 2019

TAHUN	1 - 1 1/2 Storey Terraced		2 - 2 1/2 Storey Terraced		1 - 1 1/2 Storey Semi-Detached		2 - 2 1/2 Storey Semi-Detached		Detached		Condominium/ Apartment		Flat		Low-Cost Flat		Low-Cost House		Cluster House		Town House		Jumlah	
Pembeli	B	BB	B	BB	B	BB	B	BB	B	BB	B	BB	B	BB	B	BB	B	BB	B	BB	B	BB	B	BB
2016	20,301	16,135	13,724	28,646	6,159	3,342	2,204	6,623	5,526	5,564	5,976	15,369	3,267	5,386	4,916	4,648	8,328	5,485	816	953	365	767	71,582	92,918
2017	19,745	14,956	14,907	28,774	6,070	3,081	1,890	6,176	5,509	5,751	5,700	14,310	3,644	4,627	5,077	4,008	8,179	5,044	733	954	394	760	71,848	88,441
2018	20,733	14,304	14,769	27,427	5,863	2,943	1,697	5,881	5,439	5,525	6,239	13,446	3,774	4,669	5,441	3,858	8,658	4,902	843	962	462	813	73,918	84,730
Jan-Jun 2019	11,335	6,953	7,854	13,612	3,002	1,483	840	2,849	2,938	2,827	3,448	6,811	1,971	2,177	2,879	1,829	4,410	2,563	433	574	217	422	39,327	42,100
Jumlah 2016 - H1 2019	72,114	52,348	51,254	98,459	21,094	10,849	6,631	21,529	19,412	19,667	21,363	49,936	12,656	16,859	18,313	14,343	29,575	17,994	2,825	3,443	1,438	2,762	256,675	308,189
Jumlah B + BB	124,462		149,713		31,943		28,160		39,079		71,299		29,515		32,656		47,569		6,268		4,200		564,864	
% Pembeli	57.9%	42.1%	34.2%	65.8%	66.0%	34.0%	23.5%	76.5%	49.7%	50.3%	30.0%	70.0%	42.9%	57.1%	56.1%	43.9%	62.2%	37.8%	45.1%	54.9%	34.2%	65.8%	45.4%	54.6%

## Catatan

B - Bumiputera

BB- Bukan Bumiputera

## Ulasan:

1. Secara keseluruhan, transaksi kediaman adalah majoriti dimiliki oleh Bukan Bumiputera
2. Mengikut jenis, transaksi melibatkan Bumiputera adalah lebih tinggi bagi kediaman jenis teres setingkat, berkembar setingkat, flat kos rendah, rumah kos rendah.
3. Pembeli bukan Bumiputera adalah majoriti memiliki pasaran harta berkembar 2 tingkat, sesebuah, kondominium/apartment dan rumah bandar.

**MESYUARAT KETIGA, PENGGAL KEDUA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : JAWAB LISAN**

**DARIPADA : DATO' SERI ANWAR BIN IBRAHIM  
[PORT DICKSON]**

**TARIKH : 11.11.2019 (ISNIN)**

**SOALAN**

minta **MENTERI PEMBANGUNAN LUAR BANDAR** menyatakan tindakan terkini yang dilakukan oleh Kementerian bagi membantu rakyat miskin terutama penduduk di luar bandar di Sabah dan Sarawak yang majoritinya masih di tahap yang amat membimbangkan.

**JAWAPAN**

Tuan Yang di-Pertua,

Untuk makluman Yang Berhormat, mengikut Laporan Penyiasatan Pendapatan Isi Rumah dan Kemudahan Asas 2016 yang disediakan oleh Jabatan Perangkaan Malaysia, insiden kemiskinan di luar bandar pada tahun 2016 adalah pada kadar 1% berbanding 2014 pada kadar 1.6%. Kementerian turut mengambil maklum insiden kemiskinan yang lebih tinggi di luar bandar Sabah dan Sarawak iaitu masing-masing 5.3% dan 1.1% pada tahun 2016.

Salah satu matlamat Dasar Pembangunan Luar Bandar 2030 (DPLB 2030) yang dilancarkan pada 27 Jun 2019 yang lalu adalah untuk meningkatkan kesejahteraan penduduk luar bandar dari segi ekonomi, sosial, budaya dan persekitaran. Dalam hal ini, Kementerian telah melaksanakan program khusus untuk membantu penduduk luar bandar di dalam kategori miskin dan miskin tegar seperti Program Perumahan Rakyat Termiskin (PPRT), Program Latihan Kemahiran dan

Kerjaya (PLKK), Program Peningkatan Pendapatan (PPP) serta program-program keusahawanan termasuk di bawah agensi KPLB seperti KEMAS, MARA dan Lembaga Kemajuan Wilayah bagi membantu meningkatkan pendapatan isi rumah penduduk di luar bandar.

Untuk makluman Yang Berhormat, dari bulan Mei 2018 sehinggalah 30 September 2019 sejumlah RM3.50 billion peruntukan pembangunan telah diluluskan bagi kedua-dua negeri Sabah dan Sarawak.

Bagi negeri Sabah, pada tahun 2018 sahaja sejumlah RM970.39 juta telah diperuntukkan bagi melaksanakan 90 program/projek bagi manfaat masyarakat luar bandar Sabah. Manakala, bagi tahun 2019 pula, sejumlah 127 program/ projek telah diluluskan melibatkan 29 program/ projek baru dan 98 program/ projek sambungan dengan peruntukan berjumlah RM1.09 billion.

Untuk negeri Sarawak pula, sejumlah 84 program/ projek telah diluluskan pada tahun 2018 melibatkan peruntukan berjumlah RM756.18 juta. Pada tahun ini pula, terdapat 109 program/ projek telah diluluskan melibatkan 25 program/ projek baru dan 84 projek sambungan dengan peruntukan berjumlah RM690.89 juta. Sukacita ingin saya maklumkan kepada Yang Berhormat bahawa jumlah peratusan peruntukan Pembangunan yang diluluskan bagi kedua-dua negeri Sabah dan Sarawak bagi tahun 2018 dan 2019 adalah melebihi separuh daripada peruntukan Kementerian ini.

Selain itu, Kementerian juga telah mengenal pasti 13 daerah di Sarawak dan 5 daerah di Sabah yang mempunyai pendapatan purata bulanan di bawah RM4,000 di mana penumpuan pembangunan akan diberikan kepada kampung-kampung di dalam daerah tersebut terutamanya yang berkaitan dengan program-program pembangunan ekonomi yang boleh meningkatkan pendapatan dan taraf hidup penduduk di kampung tersebut. Kementerian juga sedang meneliti cadangan program-program baharu untuk dilaksanakan di bawah Rancangan Malaysia Kedua Belas khusus untuk meningkatkan pendapatan penduduk luar bandar, seperti mana yang telah digariskan di bawah DPLB 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI HAJI ABDUL HADI**  
**AWANG [ MARANG ]**  
**TARIKH : 11 NOVEMBER 2019 (ISNIN)**

**SOALAN NO. 24**

**Y.B. DATO' SERI HAJI ABDUL HADI AWANG [ MARANG ]** minta **MENTERI KEWANGAN** menyatakan apakah strategi yang telah dijalankan oleh Kerajaan khususnya Bank Negara untuk mengembalikan nilai Ringgit Malaysia ke potensi sebenarnya dalam masa 3 tahun sepertimana dijanjikan dalam Buku Harapan.

**JAWAPAN**

Tuan Yang di-Pertua,

Untuk tahun ini sehingga 7 November 2019, nilai ringgit telah mengukuh sebanyak 0.23 peratus. Prestasi ringgit adalah sejajar dengan pergerakan kebanyakan mata wang serantau lain yang telah berubah nilai dalam lingkungan -5 peratus dan 7 peratus berbanding dolar Amerika Syarikat (AS).

Dalam keadaan pasaran kewangan global yang tidak menentu, kadar pertukaran ringgit yang fleksibel memainkan peranan penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Sehubungan itu, Kerajaan melalui Bank Negara Malaysia (BNM) sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah untuk memastikan kecairan mencukupi, pasaran yang berdaya tahan dan mengurangkan aktiviti spekulasi dalam pasaran.

Langkah ini termasuk menetapkan syarat supaya sebahagian besar daripada hasil eksport dalam mata wang asing ditukarkan kepada ringgit bagi meningkatkan mudah tunai wang asing dalam pasaran dalam negeri dan meningkatkan penguatkuasaan ke atas peraturan tukaran asing sedia ada bagi mencegah aktiviti spekulasi mata wang ringgit diniagakan di luar pesisir. Pada masa sama, BNM telah memperkenalkan instrumen pelindung nilai (*hedging instruments*) dan menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik.

Dalam jangka masa panjang, nilai ringgit akan didorong terutamanya oleh asas ekonomi negara yang kukuh. Oleh yang demikian, Malaysia akan menumpukan usaha untuk meningkatkan daya tahan ekonomi dengan mempelbagaikan sumber ekonomi serta memperkukuh daya saing ekonomi dan kedudukan fiskal negara.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN WONG LING BIU**  
**[SARIKEI]**  
**TARIKH : 11 NOVEMBER 2019 (ISNIN)**

**SOALAN NO. 25**

**Y.B. TUAN WONG LING BIU [ SARIKEI ]** minta **MENTERI KEWANGAN** menyatakan berapa jumlah wang yang akan diperuntukkan kepada Suruhanjaya Pilihan Raya untuk Pilihan Raya Negeri Sarawak ke-12 yang akan datang.

**JAWAPAN**

Tuan Yang di-Pertua,

Untuk makluman Ahli Yang Berhormat, persiapan bagi menghadapi PRN Sarawak Ke-12 yang dijangka diadakan pada tahun 2021 akan dilaksanakan dalam tiga (3) fasa iaitu Fasa Pertama pada tahun 2019, Fasa Kedua pada tahun 2020 dan Fasa Ketiga pada tahun 2021.

Kementerian Kewangan telah meluluskan peruntukan tambahan berjumlah RM1.30 juta pada tahun 2019 kepada SPR untuk persiapan Fasa Pertama tahun 2019 bagi melaksanakan Program Perintis High Impact Smart Training Ketua Tempat Mengundi (HIST-KTM) di Sarawak.

Keperluan peruntukan bagi persiapan Fasa Kedua tahun 2020 telah pun diambil kira dalam penyediaan Anggaran Perbelanjaan Persekutuan 2020 yang akan diumumkan di Parlimen pada 11 Oktober 2019 kelak. Manakala baki bagi persiapan untuk Fasa Ketiga tahun 2021 akan disediakan dalam Anggaran Perbelanjaan Persekutuan 2021.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HASAN BIN ARIFIN [ROMPIN]**

**TARIKH : 11 NOVEMBER 2019 [ ISNIN ]**

**SOALAN NO. 26**

Minta **MENTERI PERUMAHAN DAN KERAJAAN TEMPATAN** menyatakan jumlah rumah yang dibina mengikut pecahan kategori harga dari tahun 2014 hingga 2018 seperti >RM100,000 hingga RM200,000 >RM200,000 hingga RM300,000 >RM300,000 hingga RM400,000 >RM400,000 hingga RM500,000 dan; >RM500,000 hingga RM1,000,000.

**JAWAPAN**

Tuan Yang di-Pertua,

1. Untuk makluman Yang Berhormat, berdasarkan maklumat kemajuan projek perumahan swasta berlesen di Jabatan Perumahan Negara (JPN), sebanyak 328,329 unit rumah berharga RM1 juta ke bawah telah diluluskan pembinaan sepanjang tempoh 2014 hingga 2018 sebagaimana jadual berikut :

**MAKLUMAT UNIT RUMAH BAGI PEMAJUAN SWASTA YANG DILULUSKAN  
DI JABATAN PERUMAHAN NEGARA  
BAGI TEMPOH 2014 HINGGA 2018**

TAHUN	KATEGORI HARGA						JUMLAH UNIT RUMAH
	BAWAH RM100,000	RM100,001 HINGGA RM200,000	RM200,001 HINGGA RM300,000	RM300,001 HINGGA RM400,000	RM400,001 HINGGA RM500,000	RM500,001 HINGGA RM1 JUTA	
2014	11,018	4,576	6,943	4,250	2,632	21,986	51,405
2015	10,998	12,313	7,963	2,871	2,259	20,056	56,460
2016	8,062	4,479	6,208	1,887	675	20,790	42,101
2017	7,837	8,821	19,470	4,696	2,013	25,200	68,037
2018	5,438	3,948	18,072	5,173	1,918	29,420	63,969
<b>JUMLAH</b>	43,353	34,137	58,656	18,877	9,497	117,452	328,329

Sumber: Sistem IDAMAN, Jabatan Perumahan Negara

Nota:

- (i) Berdasarkan kepada Janaan laporan pada 8 November 2019
- (ii) Berdasarkan lesen pertama yang diluluskan pada tahun 2014 - 2019
- (iii) Berdasarkan harga minimum dan harga maksimum semasa (terkini)
- (iv) Tidak mengambil kira projek yang dibatalkan
- (v) Janaan maklumat ini adalah merujuk kepada perumahan swasta yang berlesen di Jabatan Perumahan Negara (Akta 118) yang meliputi semenanjung Malaysia

3. Untuk makluman Yang Berhormat juga, jumlah unit yang dilaporkan ini adalah tidak tertakluk kepada rebat, diskaun atau penurunan harga oleh pemaju mengikut keadaan semasa dan unit ini juga adalah jumlah yang dicadangkan oleh pemaju untuk dijual.

4. Manakala bagi Program Perumahan Rakyat (PPR) yang dilaksanakan di bawah Kementerian Perumahan dan Kerajaan Tempatan (KPKT), secara keseluruhannya sehingga Disember 2018, terdapat 133 projek meliputi 88,054 unit rumah yang merupakan rumah yang dijual dengan harga RM35,000 (Semenanjung Malaysia) dan RM42,000 (Sabah dan Sarawak) telah disiapkan. Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SIVAKUMAR VARATHARAJU NAIDU  
[BATU GAJAH]**

**TARIKH : 11 NOVEMBER 2019 (ISNIN)**

**SOALAN NO. 27**

**TUAN SIVAKUMAR VARATHARAJU NAIDU [BATU GAJAH]** minta **MENTERI KESIHATAN** menyatakan secara terperinci mengenai keberkesanan pelaksanaan program PeKa B40. Adakah Kementerian berhasrat untuk mempertingkatkan lagi faedah PeKa B40 serta kriteria kelayakan peserta bagi program kesihatan ini.

**JAWAPAN**

**Tuan Yang di-Pertua,**

Skim Peduli Sihat untuk Kumpulan B40 atau dikenali sebagai PeKa B40 telah dilaksanakan di seluruh Negara sebagai projek perintis bermula 15 April 2019. Skim ini memberi fokus kepada saringan kesihatan bagi penyakit tidak berjangkit. Empat pakej manfaat yang ditawarkan adalah:

- i. Saringan Kesihatan
- ii. Bantuan Alat Perubatan
- iii. Insentif Melengkapkan Rawatan Kanser; dan
- iv. Insentif Tambang Pengangkutan.

Penerima Bantuan Sara Hidup (BSH) yang berumur 50 tahun ke atas dan pasangannya yang berdaftar adalah layak secara automatik menyertai skim ini. PeKa B40 dilaksanakan dengan kerjasama klinik perubatan swasta yang berminat dan enam (6) makmal swasta

berangkaian yang dikontrak. Sehingga 24 September 2019, sebanyak 1,430 buah klinik perubatan swasta telah berdaftar sebagai Klinik PeKa B40. Seramai 88,844 orang penerima BSH termasuk pasangan mereka yang berdaftar, berumur 50 tahun dan ke atas telah pun menjalani saringan kesihatan di bawah PeKa B40. Sehingga 1 September 2019, seramai 655 orang menerima manfaat 2, seramai 229 orang telah menerima manfaat 3 dan seramai 703 orang telah menerima manfaat 4.

Dari segi keberkesanan PeKa B40, analisis sehingga 31 Julai 2019 menunjukkan sebanyak 55 peratus kes baru berjaya dikesan menghidap sekurang-kurangnya salah satu daripada penyakit tidak berjangkit berikut iaitu kencing manis, tekanan darah tinggi, tinggi kolesterol darah, kemurungan (*depression*) dan kerisauan (*anxiety*).

Kementerian Kesihatan Malaysia (KKM) akan mempertimbangkan untuk mengembangkan Peka B40 dari segi faedah atau manfaat serta kriteria kelayakan peserta bagi program ini setelah penilaian keberkesanan secara menyeluruh terhadap projek perintis PeKa B40 ini dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 11 NOVEMBER 2019 [ ISNIN ]**

**SOALAN**

Minta **MENTERI PERUMAHAN DAN KERAJAAN TEMPATAN** menyatakan berapakah kadar nisbah harga rumah kepada pendapatan tahunan ataupun median multiple bagi kemampuan memiliki rumah mengikut tahun dari 2014 hingga 2018.

**JAWAPAN**

Tuan Yang di-Pertua,

1. Untuk makluman Yang Berhormat, berdasarkan data Kajian Dasar Perumahan Negara yang dilaksanakan oleh Kementerian Perumahan dan Kerajaan Tempatan (KPKT), Universiti Islam Antarabangsa Malaysia (UIAM) serta Khazanah Research Institute (KRI) di antara tahun 2014 dan tahun 2016, peningkatan median harga rumah adalah 5.7% (Compound Annual Growth Rate - CAGR) berbanding peningkatan median pendapatan isi rumah iaitu sebanyak 6.5% (CAGR).

2. Selain itu, pengiraan CAGR ini juga bergantung kepada hasil dapatan *House Income Expenditure Survey* (HIES) yang dilaksanakan oleh Jabatan Perangkaan Malaysia sebanyak 2 kali dalam tempoh setiap 5 tahun. Oleh itu, HIES seterusnya sedang dilaksanakan dalam tahun ini dan hasil dapatannya akan diterbitkan pada tahun 2020. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. PUAN MARIA CHIN BINTI**  
**ABDULLAH [ PETALING JAYA ]**  
**TARIKH : 11 NOVEMBER 2019 (ISNIN)**

**SOALAN NO. 29**

**Y.B. PUAN MARIA CHIN BIN ABDULLAH [ PETALING JAYA ]** minta **MENTERI KEWANGAN** menyatakan dasar Kerajaan untuk menangani masalah 87% daripada golongan pesara swasta dianggarkan tidak mempunyai simpanan KWSP yang mencukupi.

**JAWAPAN**

Tuan Yang di-Pertua,

Untuk makluman Ahli Yang Berhormat, Kumpulan Wang Simpanan Pekerja (KWSP) telah memperkenalkan Konsep Simpanan Asas mengikut umur mulai tahun 2008. Amaun Simpanan Asas semasa yang ditetapkan adalah RM240,000 pada umur 55 tahun. Tujuannya adalah supaya ahli memperoleh pendapatan sekurang-kurangnya RM1,000 sebulan selama 20 tahun bermula daripada umur 55 tahun hingga 75 tahun iaitu selaras dengan jangka hayat penduduk Malaysia. Amaun RM1,000 sebulan tersebut adalah berdasarkan kadar pencen minimum pesara sektor awam (Kerajaan) bagi menampung keperluan asas semasa persaraan.

Berdasarkan statistik ahli KWSP setakat bulan September 2019, hanya 20% daripada keseluruhan ahli KWSP berumur di antara 18 hingga 55 tahun yang mempunyai simpanan dalam Akaun 1 yang melebihi Kuantum Simpanan Asas yang ditetapkan mengikut umur. Keadaan ini sudah pasti sangat membimbangkan kerana majoriti ahli dijangkakan tidak mempunyai simpanan yang mencukupi bagi sekurang-kurangnya menampung keperluan asas persaraan kelak.

Untuk makluman Ahli Yang Berhormat juga, antara faktor-faktor yang menyumbang kepada jumlah simpanan persaraan yang rendah ini ialah gaji yang rendah, caruman yang tidak konsisten, pengeluaran pra-persaraan dan kadar kesedaran perancangan persaraan dan celik kewangan yang rendah. Bagi menangani situasi ini, KWSP telah mempelbagaikan saluran ahli untuk menambah simpanan melalui caruman sukarela, selain melaksanakan pelbagai inisiatif bagi meningkatkan kadar celik kewangan dan perancangan kewangan.

KWSP telah memperkenalkan Khidmat Nasihat Persaraan (RAS) mulai Julai 2014 yang diberikan secara percuma kepada ahli sebagai langkah membantu orang ramai merancang kewangan untuk bekalan persaraan. KWSP juga telah melancarkan Belanjawanku, satu panduan perbelanjaan minimum bulanan mengikut kategori dan perkhidmatan untuk pelbagai isi rumah. Belanjawanku boleh digunakan untuk merancang perbelanjaan peribadi dan keluarga. Sebagai projek perintis, Belanjawanku dikeluarkan berdasarkan pola perbelanjaan isi rumah di Lembah Klang dan akan diperluaskan ke negeri-negeri yang lain pada masa akan datang.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI DR. SHAHIDAN BIN KASSIM [ ARAU ]**  
**TARIKH : 11 NOVEMBER 2019 (ISNIN)**

**SOALAN NO. 30**

**Y.B. DATO' SERI DR. SHAHIDAN BIN KASSIM [ ARAU ]** minta **MENTERI KEWANGAN** menyatakan pihak Kerajaan telah berhutang melebihi RM125 bilion, mengambil pula wang Petronas sebanyak RM80 bilion dan menjual aset-aset negara sebanyak RM20 bilion:-

- (a) mohon penjelasan, berapa banyakkah aset yang perlu dijual lagi oleh pihak Kerajaan bagi meneruskan kelangsungan Kerajaan; dan
- (b) adakah Kerajaan sedar bahawa prestasi urus tadbir kewangan kini sangat teruk dan adakah Yang Berhormat bersedia mengambil tanggungjawab di atas kecelaruan berkenaan.

**JAWAPAN**

Tuan Yang di-Pertua,

Pada masa ini tiada aset Kerajaan yang dijual dan perancangan penjualan aset bergantung kepada keperluan pada masa akan datang. Keputusan pelupusan aset adalah diuruskan oleh Jabatan Perdana Menteri di bawah YAB Perdana Menteri.



Sehingga akhir Oktober 2019, jumlah pinjaman kasar bagi 10 bulan pertama 2019 adalah sebanyak RM121 bilion iaitu bagi membiayai semula hutang yang matang sebanyak RM61.7 bilion untuk tempoh Januari sehingga Oktober 2019 dan baki RM59.3 bilion adalah untuk membiayai defisit dan *prefunding* untuk hutang yang akan matang dalam tempoh November dan Disember 2019. Oleh yang demikian, kedudukan hutang Kerajaan Persekutuan pada akhir Oktober 2019 adalah sebanyak RM800.5 bilion atau 52.8% daripada Keluaran Dalam Negeri Kasar (KDNK).

Kedudukan kewangan Kerajaan pada masa ini adalah baik di mana Kerajaan telah berjaya mengurangkan defisit daripada 3.7% pada 2018 dan dianggarkan terus berkurang kepada 3.4% pada tahun ini dan 3.2% pada 2020. Prestasi ini turut disokong dengan tahap penarafan kredit yang kekal pada kategori 'A'. Pengekalan penarafan kredit menunjukkan keyakinan agensi penarafan kredit antarabangsa ke atas pengurusan ekonomi negara.

Pada 2019, Kerajaan dijangka menerima dividen Petronas berjumlah RM54 bilion merangkumi RM24 bilion dividen tahunan berdasarkan prestasi keuntungan Petronas dan harga minyak mentah dunia. Baki RM30 bilion adalah dividen khas bagi membiayai tunggakan bayaran balik cukai pendapatan dan GST yang diwarisi daripada pentadbiran terdahulu.

Dari segi tadbir urus kewangan, pelbagai langkah telah dilaksanakan termasuk penubuhan Jawatankuasa Khas Parlimen, Jawatankuasa Pengurusan Hutang dan Jawatankuasa Pembaharuan Cukai. Di samping itu, Kerajaan juga akan memperkenalkan Akta Perolehan Kerajaan dan Akta Tanggungjawab Fiskal. Kesemua langkah ini bagi memastikan pengurusan kewangan yang lebih cekap, telus dan bertanggungjawab.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN AHMAD BIN HASSAN**  
**[PAPAR]**  
**TARIKH : 11 NOVEMBER 2019 (ISNIN)**

**SOALAN NO. 31**

**Y.B. TUAN AHMAD BIN HASSAN [ PAPAR ]** minta **MENTERI KEWANGAN** menyatakan apakah Kerajaan tidak boleh memberi peruntukan yang lebih sementara menunggu permintaan 20% royalti diluluskan untuk Sabah dan Sarawak.

**JAWAPAN**

Tuan Yang di-Pertua,

Untuk makluman Ahli Yang Berhormat, Kerajaan Persekutuan sentiasa komited dan tidak meminggirkan mana-mana negeri dalam memastikan pembangunan sosioekonomi yang saksama dan inklusif seterusnya meningkatkan kesejahteraan rakyat. Berdasarkan peruntukan pembangunan Negeri Sabah sebanyak RM5.2 bilion dan Sarawak sebanyak RM4.5 bilion bagi tahun 2020 dan 2019, ianya merupakan sebanyak 32 peratus berbanding peruntukan pembangunan yang diperuntukkan kepada semua negeri. Bagi tahun 2020, Sabah dan Sarawak kekal sebagai negeri yang menerima Perbelanjaan Pembangunan tertinggi.

Selain itu, bagi menunjukkan keprihatinan terhadap rakyat di Sabah dan Sarawak, Kerajaan menggandakan lebih 100 peratus lagi kadar Pemberian Khas, yang tidak disemak sejak 1969, sehingga RM106.8 juta untuk Sabah dan RM64 juta untuk Sarawak dalam tempoh lima tahun.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SERI REEZAL MERICAN B. NAINA**  
**MERICAN**  
**[KEPALA BATAS]**  
**TARIKH : 11 NOVEMBER 2019 (ISNIN)**

**SOALAN NO. 32**

**Y.B. DATO' SERI REEZAL MERICAN B. NAINA MERICAN [ KEPALA BATAS ]**  
minta **MENTERI KEWANGAN** menyatakan perincian pendapatan yang  
diperoleh Kerajaan melalui Cukai Jualan dan Perkhidmatan (SST) sejak  
diperkenalkan semula pada September 2018. Mohon dinyatakan tarikh sebenar  
pendapatan SST dimasukkan ke Akaun Hasil Disatukan Kerajaan .

**JAWAPAN**

Tuan Yang Di-Pertua,

Untuk makluman Ahli Yang Berhormat, kutipan cukai jualan dan cukai perkhidmatan mulai tarikh pelaksanaan semula cukai jualan dan cukai perkhidmatan pada 1 September 2018 sehingga 31 Oktober 2019 adalah sebanyak RM28.08 bilion. Daripada jumlah tersebut, kutipan cukai jualan adalah sebanyak RM16.63 bilion, manakala cukai perkhidmatan sebanyak RM11.45 bilion.

Semua kutipan hasil cukai langsung seperti cukai pendapatan syarikat dan cukai pendapatan individu, serta cukai tidak langsung seperti cukai jualan dan cukai perkhidmatan merupakan hasil Kerajaan Persekutuan dan akan dimasukkan ke dalam Kumpulan Wang Disatukan. Hasil cukai jualan dan cukai perkhidmatan telah dimasukkan ke dalam Kumpulan Wang Disatukan bermula dari tarikh berikut:

1. Cukai Jualan Import mulai 1 September 2018;
2. Cukai Jualan Tempatan mulai 9 Oktober 2018;
3. Cukai Perkhidmatan Tempatan mulai 4 Oktober 2018; dan
4. Cukai Perkhidmatan Import mulai 14 Februari 2019.

Perbezaan tarikh adalah disebabkan oleh tarikh kuatkuasa pelaksanaan dan tempoh pertama penghantaran *tax return* bagi setiap jenis cukai yang terlibat.

**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN KASTHURIRAANI A/P PATTO  
[ BATU KAWAN ]**

**TARIKH : 11 NOVEMBER 2019 [ ISNIN ]**

**SOALAN NO. 33**

Minta **MENTERI PERUMAHAN DAN KERAJAAN TEMPATAN** menyatakan rancangan Kerajaan untuk membekalkan rumah sewa pada kadar RM125 sebulan selepas Projek Perumahan Rakyat (PPR) dijenamakan semula sebagai Projek Perumahan Malaysia (PPM) dan apakah usaha Kerajaan untuk membantu golongan B40 untuk memiliki rumah mampu milik.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) sentiasa peka dengan keperluan golongan B40 yang memerlukan perumahan yang sejahtera dengan kadar belian dan sewaan yang tidak membebankan. Dalam hubungan ini, terdapat **90 projek** yang melibatkan **75,430 unit rumah Program Perumahan Rakyat (PPR) Disewa** dengan **kadar sewaan sebanyak RM124 sebulan** telah dilaksanakan di seluruh Negara dan telah memberi manfaat kepada 377,150 keluarga.

2. Mengambil kira bebanan kos pengurusan bangunan yang semakin meningkat serta bagi memastikan penyelenggaraan dijalankan dengan lebih teratur dan menyeluruh, Kementerian sedang meneliti semula kos sedia ada bersama dengan Kerajaan Negeri agar kadar baru sewaan tidak membebankan.

3. Justeru, cadangan penjenamaan semula PPR ini akan melibatkan perbezaan harga rumah, Kerajaan akan sedaya mampu menyediakan bantuan kepada golongan B40 ini untuk memiliki rumah melalui kaedah sewaan secara *Rent to Own* atau *end financing* tertentu yang sedang dalam peringkat rundingan antara KPKT dengan institusi kewangan.

4. Untuk makluman Yang Berhormat juga, antara usaha lain yang disediakan oleh Kerajaan bagi membantu golongan B40 adalah seperti berikut:

- i) **Penyediaan 1 Juta Rumah Mampu Milik (RMM)** dalam tempoh 10 tahun;
- ii) **Skim pembiayaan kewangan fleksibel** yang menawarkan pakej pinjaman menyeluruh;
- iii) **Pemanjangan tempoh pembiayaan perumahan sektor awam** di bawah Lembaga Pembiayaan Perumahan Sektor Awam (LPPSA);
- iv) **Jaminan Cagamas SRP Berhad** untuk membantu golongan muda yang berpendapatan RM3,000 sebulan dan ke bawah untuk memiliki rumah;
- v) **Diskaun Plus**, penawaran diskaun oleh pemaju perumahan dengan *zero deposit* (yang disokong oleh skim jaminan Cagamas/ Skim Jaminan Kredit Perumahan); dan
- vi) **FundMyhome (Crowd Funding)**, konsep di mana rakyat boleh mendapatkan bantuan kewangan untuk membeli rumah melalui kaedah pinjaman terbuka.

5. Selain itu, selaras dengan pembentangan **Belanjawan 2020** kerajaan telah mengumumkan beberapa inisiatif perumahan seperti berikut:-

- i) **Dana Rumah Mampu Milik** bagi membantu pembeli rumah golongan berpendapatan rendah untuk membeli rumah pertama;
- ii) **Skim Perumahan Belia** melalui Cagamas; dan
- iii) Penyediaan Belanjawan sebanyak **RM70 juta** untuk **perumahan generasi baru peneroka FELDA.**

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KETIGA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN AHMAD JOHNNIE BIN ZAWAWI**  
**[IGAN]**  
**TARIKH : 11 NOVEMBER 2019 (ISNIN)**

**SOALAN NO. 34**

**Y.B. TUAN AHMAD JOHNNIE BIN ZAWAWI [ IGAN ]** minta **MENTERI KEWANGAN** menyatakan adakah pihak Kementerian bercadang untuk menyediakan perkhidmatan Bank Simpanan Nasional (BSN) di daerah Daro, Mukah memandangkan jumlah penduduk yang semakin ramai.

**JAWAPAN**

Tuan Yang di-Pertua,

Untuk makluman Ahli Yang Berhormat, Bank Simpanan Nasional (BSN) telah menyediakan perkhidmatan perbankan di daerah Daro, Mukah, menerusi Ejen Berdaftar BSN seperti di alamat berikut:

1. GS Time Telecommunication  
No 17, Main Bazaar  
96000 Daro, Sarawak  
Mula beroperasi : 21 Disember 2012
  
2. Koperasi SMK Toh Puan Datuk Patinggi Hajah Normah  
KM 2, Jalan Itol  
96000 Daro, Sarawak  
Mula beroperasi: 31 Mac 2015
  
3. Kazry Kamarudin  
Kampung Badong  
96000, Daro, Sarawak  
Mula beroperasi: 11 Disember 2012

Jumlah purata penduduk di daerah Daro, Mukah yang telah mendapat manfaat daripada penubuhan Ejen Berdaftar BSN tersebut adalah seramai 3600 orang. Di antara perkhidmatan yang ditawarkan menerusi Ejen Berdaftar BSN di daerah tersebut adalah seperti perkhidmatan pembukaan akaun, perkhidmatan berkaitan simpanan, pengeluaran tunai, pembayaran bil utiliti, pembelian e-Sijil Simpanan Premium BSN, tambah nilai prabayar telefon bimbit dan perkhidmatan pembelian tanpa tunai.